

二真


一百二十五


永樂大典

卷一萬三千四百九十八

之一萬三千四百九十九

This m.s. volume of a great
Chinese Encyclopedia dating in its
^{present form}
from the close of 18th century,
was saved from the burning
of the Hanlin Library Peking
during the siege of the Legations
June 20th August 1900, by
Mr. Jours Leg of the Consular
Service, who gave it to A. J. Dennis
Leg of the same service. From
it was presented to me April 29, 1908
by Dennis





永樂大典卷之一萬三千四百九十八 二真

制

除官制

宋劉攽彭城集皇叔右武衛大將軍環州刺史叔滕可遙郡團練使皇叔右千牛衛將軍仲馨可授大將軍制。勅

百官奉事由功實以為資級。公族論恩在久次則當遷叙。此朝廷治内外之法。本忠厚之意也。具官叔滕天潢之別。漸漬德潤。麟趾之世。信厚有取。備官環衛。兼刺名郡。既積年勞。宜加爵秩。假雄稱於團結。資威望於使領。勉服光寵。益勵名節。仲馨備官環衛。貴視命卿。既積年勞。宜加爵秩。不移幕府之號。姑假元帥之寵。勉服休命。益勵名節。可。皇叔右監門衛大將軍滁州團練使仲歆。可遙郡防禦使皇叔右監門率府率仲璫。可右千牛衛將軍制。勅具官某等公族之恩。戚疎有叙。存著賞延之典。沒隆郵之義。以乃父遺顧而有言。矜諸子藐露而為請。並從加秩。以尉泉下。并駒過隙。既就外除。維柞疏榮。肇推新命。咸思恪慎。以報義方。可。皇叔右監門衛大將軍仲的。可右武衛大將軍。遙郡刺史皇叔太子右監門率府率

仲歲。可小將軍制。勅具官某等。朕纘嗣昌業。覃慶列位。小大之臣。莫不受賜。矧其屬在公族。可使後於庶姓。而爾等皆以親憂。弗俟成命。既給達禮。宜申前寵。或進躋武衛。而領郡符。或升列環尹。初備幕府。敬服異數。益修善行。可皇叔右武衛大將軍。袁州刺史。仲遠。可遙郡團練使。皇叔右監門衛大將軍。叔羅。可遙郡刺史制。勅具官某等。吾以材能。賦爵而宗室。以戚屬處位。吾以功事。課吏而公族。以年勞。計最。治親之禮。異於外朝。所以崇博。敘之典。厚而勿薄。雖然。宗子之能。畏慎無過。其亦有信厚之風。蒙被寵數。不爲濫矣。仲遠。備位環尹。外領州符。稍加團結之名。以示遷擢之次。叔羅。備位環尹。既開幕府。稍假左符之重。以示專城之貴。祇服休命。毋怠恪居。可蔡端明集皇親大將軍。遙郡制。勅昔我祖宗聖神。以有天下。付畀於予。惟是孝誠。以克保乂。親執籩盞。見于郊廟。宗籍群辟。莫不齋明。以奉祠事。庶幾敦於善行。成於美化。况慶賚之行。予何嗇焉。具官某。天資信厚。濟以學術。肅雍助祭。率繇禮度。勲階并賦。用觀親賢。汝其念之。無懈夙夜。韓維。南陽集皇兄右屯衛大將軍。克愉。可依前右屯軍衛大將軍。照州刺史制。勅朕承祖宗之憲。厚骨肉之親。命官而不責。以事。所以全愛也。計考而叙進其秩。所以示寵也。具官某。襲是慶善。挺然秀穎。幼服仁

義之訓遂爲全人。入循孝悌之規。靡有過事。宜卽衛軍之領。進兼刺部之榮。當體渥恩。益勳令德。可鄭獬。鄭溪。集皇。况。仲銳等。服闋可舊官制。創鉅者其日久。痛甚者其愈遲。纓衣苴杖。寢苦乎堊室。豈將放爲無窮之哀乎。文與情稱。再期而後釋。此人道之至隆也。爾公族之秀。執喪得禮。祥祭旣徹。方委佩而登朝。宜申嘉詔。俾服舊次。勉圖令名。以盡顯親之美。可皇弟右監門衛大將軍克頤。可遙郡刺史制。王者之於宗族。尚恩而不責義。所以睦其本根。廣天下以愛也。具官某。生于王家。有此爵號。向以微累。久能自脩。其賜以部刺史之秩。往哉。祇踐永服。我光寵。可宋文鑑。除皇弟偲武成軍節度使。祁國公制。朕奉承燕謀。獲紹大統。永懷先烈。曷勝哀疚之情。眷顧同生。宜厚褒封之典。予我明命。揚于治廷。皇弟偲。岐嶷得於自然。溫文見於異稟。挾天材之美質。應帝武之嘉祥。未臨射矢之辰。遽起號弓之慕。踰年於此。錫壤惟時。矧周人尚親。尤重本支之務。漢廷左戚。亦隆襁褓之封。規裁半楚之疆。載徹濱河之域。苴茅制社。授鉞殿邦。用建上公。尹茲北國。策勳加等。衍邑實租。於戲。西望裕陵。敢忘幼子之愛。東朝長信。進預諸孫之遊。往服恩輝。益延壽祉。胡文恭公集皇姪宗懿。可端州刺史。皇姪宗述。可右屯衛大將軍制。勅國家承軒祖之詒謀。法陶唐之

敦族封爵同姓。體貌大宗。道在維寧。恩宜加腆。具官某。孝恭履德。信厚成風。具官某。性茂溫文。體資英嶷。並稟玉林之粹。悉含銀泝之和。胥被寵章。叅居環衛。奉朝惟恪。居邸有聞。朕濬百世之遙源。謹九宗之屬籍。惟時賢亮。司我本支。宜疇營職之勞。遞遷冢子之秩。特升藩刺。對總巖除。豈惟旌是似之美才。蓋以褒乃親之有德。惟欽擢敘。勿替踐脩。皇姪宗樸。可貴州刺史。皇姪宗藝。可左領衛大將軍制。勅分建宗屏。叅睦本支。環設衛官。拱扈宸極。號為要職。舉屬茂親。以爾宗樸。迥稟靈華。居然信厚。以爾宗藝。夙成體哲。樂善為猷。並茲緜昃之昌。咸睦大宗之訓。師言是率。禮範攸循。屬敦敘以崇風。宜褒嘉而進秩。列城遙刺。大將超遷。且光閭寄之雄。兼衛巖除之重。宜懋遵於法度。用對越於寵休。許景衡橫塘集。越王偲第八男。乞特賜名。可除右驍衛將軍制。朕惟祖宗。明帝堯之俊德。以親睦九族。積周家之忠厚。而本支百世。慶流玉邸。克生多男。肇頒爵命。以為爾寵。蓋有國之常典。非近屬之私恩。矧吾叔父。見謂大雅之不群。宜爾諸子。咸知為善之最樂。往服訓辭。永綏福履。可。越王偲第十二女。可宗姬制。勅眷吾叔父。為時賢王。席餘慶於祖宗。盛鍾愛於閨闈。爰稽邦典。載錫恩章。爾性稟靜專。習知淑慎。服姆師之訓。見於夙成。閱圖史之規。庶幾克踐。

益崇懿德。允協令名。尚體眷懷。永綏社祿。可蘇魏公集皇太后殿樊氏。可典賓。馮氏可典贊。吳氏可掌籍。楊氏可掌記制。勅周官女史掌內官內令之法。則今兩宮給事之職是矣。閱歲既久。增秩其宜。皇太后殿具官某氏言德有聞。閑和自飭。早陞宮掖。祇奉母儀。嘉其積勤。推以優渥。俾進司於典掌。宜益務於欽承。可太皇太后殿典言吳氏。可司設典言杜氏。可司正。吳氏。可典贊。李氏。可典記。花氏。可典珍。張氏。可典綵。劉氏。可典正。王氏。可典計。董氏。可典設。制。勅宮省有秩。典司各殊。矧長信之置官。事掖庭而寢久。宜頒渥命。用獎能勤。太皇太后殿具官某氏。性稟閑和。體資柔婉。自入承於嬪御。嘉荐歷於歲華。遞陞婦式之班。俾重慈闈之侍。往膺恩渥。無怠祇欽。可鄒道鄉先生集宮人朱氏。可掌珍制。宮官由掌而上。始預品秩。所以謹名分。而嚴勸獎也。惟時寶貨之事。尤資贊助之勤。審求其人。肆以命爾。往其祇敬。以稱恩榮。鄭夏文莊公集甘州外甥網紇。可汗王夜落隔。可特進懷寧順化。可汗王制。勅王者孝治萬方。蓋重展親之典。恩加群后。務昭崇德之規。矧在吾甥。久綏遠略。特舉褒優之命。用伸眷倚之懷。具官某。茂烈傳家。英威服衆。智慮深邃。詳練於武經。志慎直方。克敦於臣節。而自撫臨西夏。屏翰中原。允彰保塞之勲。特茂勤王之業。仍遠脩

於職貢。是愈見於忠誠。寔簡朕心。特隆朝獎。進褒功之懿號。兼馭貴之榮階。夙越等威。用旌忠毅。噫。山河誓寵。朕務在於推恩。金石盟心。爾無忘於報國。終始一志。以保令名。可。工部郎中張士遜。可。戶部郎中直昭文館。充壽春郡王府官制。勅。朕以愛子膺封建之禮。慎選端士。以輔導之。俾其居處出入之際。聞忠孝方正之言。故朕久思其人。未易輕受。自非耆重。孰副東求。以爾具官張某。資性淑均。理尚清簡。糾彈憲府。漕輓外臺。端懿之風。碩茂斯允。以爾具官崔某。業文甚雅。守道不迴。引籍諫垣。勵精史局。老成之德。慰薦良多。是用簡自朕心。命之王府。第進左民之秩。或兼上館之榮。爾其祇荷寵章。協宣懿效。規諷禮誼。以臻于道。予有望於汝也。某可。劉放彭城集右監門衛大將軍士出。士蒲令括。捐之。士編可並。遙郡刺史。右千牛衛將軍仲諲。可。右監門衛大將軍制。勅。具官某等。詩云。振振公族。夫能學問。以知古。文采以見志。則可謂有信厚之風。習爲善之樂矣。爾等咸以經術待試。有司銓能程藝。率有可取。嘉其忘膏梁之佚。安儒素之業。宜有甄賞。以示旌別。進秩加等。是謂休寵。益勵操守。毋忘初心。可。胡文恭公集。霍保安可。樞密承旨南班。賈德明可。樞密承旨帶南班。小將軍制。勅。具官某等。夫樞宥惟重。實總於幾微。音旨所承。尤資於篤慎。以爾保

安材敏而濟。以爾德明性謹且和。並隸幾廷。豫聞密政。蹈箴規而無忽。習事典而有餘。歲勞自陳。府奏來上。差進右曹之掌。兼增武弁之榮。用獎恪恭。益思敦勉。徐鉉騎省集。保定郡公景迪。可朝散大夫。檢校左僕射。賜紫制。勅朕歷選列辟。見其睦親名器之難。必當慎簡信。不可私於其屬也。故我疏寵務先。推公保定郡公景迪。靜惟端方。動必孝敬。佩師友之訓。成信厚之風。宗室之間。問望尤著。屬我嗣服之始。叶于立慶之恩。爾其率循令猷。惠迪前列。勿驕勿惰。以永乃成。王黃州小畜集。授翰林學士承旨。可依前工部尚書平章事制。門下。天道無爲。運五行而亨品物。聖人有作。設四輔以恭蒸民。方隆大寶之基。宜擇具瞻之位。其有老于文學。世事絲綸。貢昌言于顧問之間。變古道于典謨之際。宜從禁苑。擢在台司。庶符命說之篇。式展致堯之術。具官某。尼丘孕質。昂宿垂精。驥有德而可稱。鳳非時而不下。爰自優游丹禁。輝映皇家。驅三代之文章。雲蒸筆下。慎一人之禁密。鶚立朝端。諫畋獵以上書。請登封而作頌。步鼈頭而且久。歷雞樹以攸宜。未離喉舌之資。更受腹心之寄。沙湜金印。別光東閣之榮。鈴索花磚。罷赴北門之召。極人臣之位。資王佐之才。勉思啓沃之謨。勿忝崇高之任。於戲。予爲元首。汝乃股肱。推公共以爲心。弗私名器。事弼諧之茂業。用又

邦家誠之勛之。期太平之可致也。可依前件。授御史大夫。可司徒。門下侍郎。平章事制。門下。坐霜臺而司憲。振肅王綱。踐黃閭以持衡。緝熙帝載。眷惟重柄。允屬純臣。其有首冠鴛行。位崇烏府。弄印之名已著。和羹之命爰行。具官某。堯殿神羊。舜庭威鳳。五色燦補天之石。四方觀測景之圭。儼威容而青女司霜。薦祥瑞而黃人守日。爰自位尊亞相。道切致君。挺屈軼以當軒。雖能指佞。艤舩艘而在岸。宜命濟川。趙堯已振於威稜。邴吉佇觀於調燮。式耀三台之位。仍加五教之資。固敢汝私。蓋從師錫。於戲。君之命相。唯過失是求。相之愛君。惟公忠是舉。勿拂人欲。勿依于違。躋富壽而和陰陽。實有望于汝也。往欽哉。可依前件。鄭獬。鄖溪集知西山。保州董允。仲。可檢校戶部尚書制。朕之初踐祚。德澤浸於無垠。東漸乎日域。西浹乎月竈。罔有不及。而况蜀土之徼。縻我爵號。歲奉琛賁。而來庭者。其具官某。以才武之雄。授節西土。綏撫族類。不渝不震。胥附而面內。適茲大賚。思被寵光。將誇美于有衆。朕甚嘉之。夫賞籛金而賜龜綬。蓋倣古焉。宜用進秩。以榮我之休命。可王珪。公華陽集。觀文殿大學士。行戶部尚書。知許州。宋祥。可兵部尚書。知河陽制。勅文昌本喉舌之司。而總圖之萬務。盟津兼關梁之阻。而帶畿之一都。維德重者。秩益峻。政穆者。寄愈劇。矧謨者。詰

之望。宜蕃譽命之承。具官某。夷粹誠于心。文明貫孳道。入則統百工之序。以熙天之載。出則倡九州之牧。以阜民之風。朕居懷觀文之訪。而寢留穎川之治。歲聿踰閏。寵未隆賢疇。夏官以進。卿春河雖之更闡。左陪西部之勝。中峙三城之雄。土樂而俗康。訟清而教易。方推良翰之倚。猶浣舊鈞之勞。履聲如還。袞闕云補。可曾輩元豐類藁。門下侍郎尚書左右丞制。尚書萬事所出。丞相所以筦其要。門下三省之首。侍郎所以貳其長。朕稽于古義。以正官號。故合是寵秩。以命吾共政之臣。非天下之材。足以協朕之謀。繫人之望者。夫豈虛授。某。莊毅忠篤。通于古今。列于廟堂。以義陪朕。是用考擇。以爲選首。使文昌左轄之任舉。瑣闥參議之効明。六官紀綱。上之所以齊。下者無所撓。四方奏列。下之所以通。上者無所壅。以弼予一人。而亮成庶績。尚懋厥志。無忘訓詞。門下中書侍郎尚書左右丞制。尚書中書門下三省。本天下之務。而侍中令僕射。爲宰相之任。舊矣。自唐政不綱。而失其守。今朕董正治官。使三省之長。皆復其任。而於尚書左右丞左右省侍郎。秩有升降。使貳吾任政之臣。夫綱轄之地。與御史更相察舉。所以警官邪。明憲度。而侍郎於左右省。無不統理。則其所繫於體尤重。非傑出之材。不在茲選。某官端方。薦實。學有本源。預于政機。人望惟允。某。強毅

忠厚。通于古今。謀謨廟堂。休有令聞。是用命爾。以爲選首。其尚体余。所以處爾之重。勿苟勿隨。使百工庶尹。皆知爾之不私于法。罔敢不正。而政令之自上出者。罔不得宜。以稱朕所以作則垂法。始今行後之意。爾可勉矣。予有望焉。胡文恭公集。丁度可兵部侍郎。張觀可尚書左丞制。勅。具官某。朕圖政弼之舊。嘉老成之人。進退無於間言。出處全於美節。功庸前茂。朝野式瞻。特陞爵秩之崇。益示儀形之峻。具官丁某。志經道德。性合誠明。典冊擅乎辭宗。風業推於時匠。具官張某。材含厚棟。體合大圭。德好是民。彝仁以爲己任。並歷更衆職。宣暢本朝。承召昔於鑿坡。備勸講於帷幄。匪惟授道。多所納忠。資其器畧之賢。寘在樞鈞之地。夙夜勞止。功效炳然。及解去於繁機。用優崇於禁職。並延陞於別殿。或倚任於輔藩。時望益隆。朕心所簡。不有殊典。曷寵雋臣。天轄之崇。維正於八座。夏卿之貳。典幹於七兵。並用褒優。益彰峻重。當體尚賢之意。惟欽進律之恩。時我舊人。豈煩多訓。唐杜牧樊川集。崔瑛除刑部尚書。蘇滌除左丞。崔璵除兵部侍郎等制。勅。喉舌百官之本。綱轄天下之要。戎政國之大事。三人爲衆。一舉得之。唯君知臣。予不敢讓。正議大夫。尚書左丞。上柱國。賜紫金魚袋。崔瑛。德可標準。言成文章。揚歷中外。道益光顯。左省駁議。不畏強禦。分憂陝服。尹茲

東郊政既安人。化能被俗。擢任藻鑑。旋職牢籠。材皆適宜。官無逋事。分鎮股肱之郡。遂成功實之臣。陟處網曹。副以中憲。每師遽瑗。常慕史魚。抨彈之勇。正當時病。翰林學士承旨。銀青光祿大夫。行尚書兵部侍郎。知制誥。武功縣開國男。食邑三百戶。蘇滌。行冠人倫。爵高天秩。仁義禮樂之是務。克伐怨欲之不行。翱翔禁闈。出入諷議。汲黯爲郡。嘗聞卧理。下惠去國。皆以直道。洎宣室思賢。甘泉召雄。造膝盡忠。代言稽古。近以微恙。懇請自便。君子之道。進退可觀。正議大夫。前權知尚書戶部侍郎。上柱國。博陵縣開國子。食邑五百戶。賜紫金魚袋。崔璵。上知自得。不器難名。旣擅高文。兼通樸學。掌言綸閣。典貢春闈。詞同三代之風。士掇一時之秀。振舉職業。昭宣令名。詩曰。多士文王。以寧禮曰。官備天子。爲樂咨爾。璪等實瑞清時。予爲爾之德隣。爾膺予之慎選。典刑不忘於哀敬。提綱唯在於公勤。舉司馬法。勿踵近習。各膺重任。企佇上酬。宜於夙夜。無孤官業。璪可守刑部尚書。散官勲如故。滌可左丞。散官勲如故。璵可權知尚書兵部侍郎。散官勲封賜如故。裴休除禮部尚書。裴諗除兵部侍郎等制。勅。冉有仲由。孔氏門人之高弟也。尚曰。處於小國。可爲具臣。况今照臨百官。撫御四海。綰牢籠漕輓之職。掌五兵六師之重。次第超擢。爲吾大寮。若非僉諧。豈敢輕授。正議

大夫守尚書兵部侍郎兼御史大夫充諸道鹽鐵轉運使上柱國河東縣開國子食邑五百戶賜金魚袋裴休仁義禮樂文行忠信積此八者以爲成人前宣歙池等州都團練觀察處置等使太中大夫檢校左散騎常侍兼御史大夫上柱國河東縣開國男食邑三百戶賜紫金魚袋裴諗在元和代唯帝念功四夷九州文化武伏咨爾先父貴著大勳天必祚仁門有令嗣道直才富行備名高文學而澹洽專精率履而清淨恭儉而皆周歷華顯踐更臺閣處事可法出言成章咸輟自綸闈任寄方伯教訓以禮生聚以仁千里封疆一口歌詠休乃命以取士時稱得人用其公方委之管推事爲之制曲爲之防鉤校姦賊未減賦取公財不耗疲人樂生望爲準繩立作據仗名實兼備德位兩高漢史曰理行尤異者就加禮曰有功于人者進律秩崇八座官副夏卿舉以授之予亦何怪夫宰相佐天子公卿助宰相股肱指臂任同一身有事必言未爲越局無由受惜勉答寵榮休可禮部尚書依前充諸道鹽鐵轉運等使諗可權知尚書兵部侍郎散官勳封賜如故夏文莊公集翰林學士工部侍郎知制誥晁迥可刑部侍郎餘依舊制勅國家頌次祖宗之典允資石茂之才旣紬繹以成書寔精研之備至宜推異渥式獎名儒具官某局致淵通資氣淳素韞深厚之學

藻潤於訓詞。敦棲約之風。靜一於流競。表儀群士。茂聳明姿。而自總緝舊章。編研史策。歷年滋久。宣力居多。宜擢貳於秋卿。俾增輝於內禁。勉膺寵眷。無怠欽承。可。翰林學士給事中知制誥陳彭年。可工部侍郎。餘依舊制。勅。朕以頌次先猷。總裁大典。誕播無疆之美。寔資命世之才。式慶成書。宜加茂寵。具官某。清徽映世。景行服人。閑練典章。周旋要近。辨禮樂陞降之數。敦訓辭深厚之規。明識遠猷。藹於時望。而自鋪觀注記。紬繹信書。約五始之舊文。宣兩制之鴻烈。時乃之力。朕甚嘉之。宜擢貳於冬卿。用增榮於禁省。服茲休命。更竭乃誠。可。樞密副使禮部侍郎晏殊。可刑部侍郎。餘如故制。勅。內樞之重。密命是繫。允賴忠賢。叅綜兵要。眷惟勲舊。宜峻等威。具官某。道藝該明。資性方格。自懷名教之樂。淡於榮進之塗。簡自先朝。列於儲案。輔朕初載。克暢於大猷。登汝近司。俞昭於懿德。宜進天臺之秩。用增機軸之崇。更佇訏謨。啓迪予志。可。起居舍人知制誥判昭文館盛度。可工部郎中。餘依舊制。勅。國家均慶。頌祇之宮。多歷年所。大校群吏之治。咸敘其勞。在於侍臣。宜有殊寵。以爾具官某。周才敏用。奧學雄文。演潤之詞。日彰深厚之美。銓衡之任。時推平允之材。久次近班。彌昭令望。宜正名於郎位。俾增美於掖垣。更務誠明。副茲甄獎。可。刑部員外郎

知制誥新知揚州王隨。可工部郎中。餘依舊制。勅某。朕魏睢覃慶。多歷
歲年。中外庶官。已從考陟。左右近職。宜有褒優。以爾早列綸闈。出司留籥。
能以寬政。惠茲蒸人。方別寄於藩條。宜持隆於郎選。佇聞治迹。以稱朕懷。
可。翰林學士主客郎中知制誥王魯。可兵部郎中。餘依舊制。勅均慶
隆。睢。歲時滋久。陟明群吏。甄獎居多。眷惟清近之臣。宜茂褒優之典。具官
某。韻宇宏遠。資氣淑均。潔已無瑕。早勵懷霜之志。當官有守。克彰匪石之
心。自振藻於禁林。寔飛英於雋域。年華屢改。時譽彌芳。宜進秩於中臺。俾
增輝於內省。佩服優寵。更務夙宵。可。王珪。華陽集樞密副使給事中王堯
臣。可戶部侍郎參知政事制。勅中階之燮。元化。鴻樞之幹。萬兵。雖股肱
之勢。均然帷幄之體。異匪圖峻德。疇易近司。以爾具官某。執文醇深。器識
高正。早推賢級之冠。遂服禁途之游。訓辭營於帝謨。心計羨于邦賦。望久
而逾美。德劭而益冲。鄉延宥密之庭。居重安危之倚。而廟筭多勝。邊烽靡
驚。庸進秩於地官。尚同寅於宰路。况智略可以斷國論。經術可以緯皇猷。
往圖厥庸。以底于治。可。唐白居易。長慶集。韋觀。可給事中。庾敬休。可兵部
郎中。知制誥同制。勅職之要。莫先乎駁正。文之選。莫難於司言。將使朝
綱有條。朕命惟允。在二者得人而已。中大。使持節蘇州諸軍事。守蘇州

刺史。上騎都尉韋覲。精微專直。通乎事典。可使乎奏議。而坐左曹。朝散大夫。尚書禮部郎中。上柱國庾敬休。溫裕端明。飾以辭藻。可使書誥。命而專右席。而輪轅鑿柄。各適所宜。夫惟刺史守列城。郎官應列宿。選任倚注。非不榮重。然吾左右前後。方求正人。如覲敬休。不宜踈遠。亦猶有聲之玉。無類之珠。不置於佩服。掌握之間。皆非其所也。宜自敬謹。無忝吾言。覲可行給事中。散官勲如故。敬休可尚書兵部郎中。知制誥。散官勲如故。宋劉攽彭城集。承議郎殿中侍御史上官均可。兵部員外郎。兵部郎中葉祖洽。可禮部郎中制。勅具官某等。六曹屬郎。朝之精選。号曰頭司。尤爲重任。春官之掌邦禮。祈父之主戎事。決非美材。曷當遴東。以均祖洽器識。宏茂文彩。瞻麗。或恪職風憲。或收譽臺妙。宜有峻遷。以副衆望。論其初試。始被幄蘭之寵。銓此久次。益見應星之貴。勉脩職業。毋負恩渥。可。金部郎中范鏐。可京東轉運副使。京東轉運副使侯利建。可金部郎中制。勅具官某等。朝廷經費。調度金穀爲重。內則文昌地官之屬。外則漕臺使者之任。非其深思敏智。不足以當吾慎選。以某久更吏職。綽著能譽。惟此司存。雖有中外之別。至其職業。非復劇易之判。易地而處。陳力就列。益圖善最。以副民望。可。兵部郎中杜常。可光祿少卿。祠部郎中向宗旦。可兵部郎中。大常

丞賈易。可祠部郎中制。勅具官某等六曹九寺。所以挈提綱目。釐舉庶務。朝廷資以爲治者也。屬郎卿貳。是爲妙選。有以久次增敘。或繇良材。初試。吾所簡閱。未嘗輕付。常風格幹濟。陳力維舊。宗旦樞機周密。應務敏達。易儒學脩明。士論稱述。此其在官。皆有休譽。進而用之。吾何愛焉。武部掌兵伍之符籍。祠曹主中外之祀事。光祿之任。尤爲繁夥。非若漢代謹門戶之禁而已。其惟恪恭勤勩。可以稱職。汝其勉之。可曾鞏元豐類藁黃好謙戶部員外郎。劉瑄戶部郎中制。勅具官某。田疇生齒之籍。賦租課入之法。郎於省闈。典領尤重。邦之雋茂。俾服厥官。爾能敏於事功。朕豈稽於信賞。可洪平齋集王子申落致仕。除刑部郎中制。勅具官某。韓厥旣老而稟政。留侯導引。不食穀而強起。材足以爲斯世用。詎容得謝。爾操尚渾厚。風致簡遠。郡國選表。再召爾辭。遂以垂車請。幅巾林壑。獨立氛壻之表。固泊乎世味矣。朕訪西南人物於朝。謂爾年耆德明。精神未衰。懷香憲部。勉爲一來。霜峽放舟。使觀者知朕能致華髮於萬里。顧不韙歟。可徐鉉騎省集水部郎中判刑部蕭儼。可祠部郎中賜紫制。勅具官蕭儼。夫王者之爲政也。任能舉直。理刑懋功。如斯而已矣。今秋官卿佐皆闕。爾儼實專其司。定法察情。克舉攸職。切言直氣。屢聞於朝。靡私厥躬。何其愛朕之深也。

方將圖效。適屬均恩。是用就升名曹。仍加命服。俾耀省闈。時予寵章。爾其念哉。無易乃心。無回乃行。決獄以寬簡。當官以公平。一心克終。予慎嘉汝。可。浙西判官高越。可檢校水部郎中。賜紫制。勅王者之建藩輔也。必命重臣以臨之。又擇賢士以佐之。政成當遷。留而增秩。古之制也。高越以儒學淹雅。見稱于時。頃自南宮。直于東觀。筆削之言。方勵弓旌之禮。是求從事大邦。率多婉畫。有嘉令望。爰屬慶恩。俾假正郎。仍紆紫綬。服我加等之命。無懈盡規之心。元憲公集尚書司封。負外郎。知明州張弇。可尚書祠部郎中制。勅具官張弇。資性淳夷。操行廉素。鄉咨郎選。參案縣畿。心馬首公。善弗求譽。嘉聞美課。尋寵巨藩。而前此攸司。大比來上。始延恩格。更俟歲成。亦旣一周。靡或佗吝。宜真握蘭之秩。兼懋剖符之績。可王珪華陽集河北都運使李參。可諫議大夫。江淮等路都大發運使高良夫。可司勳郎中制。勅邊方控朔。蓋天下之要。西峙兵師之雄。神都即返。則邦中之費。南幹山澤之賦。朕閱幹臣於最籍。將使節于外臺。蓋委重則必傳之。寵賞先則思責于辦。以爾具官李參。風強而銳。有世資之逢。以爾具官高良夫。器敏而沈。無吏文之害。並櫛首職之裕。薦更使煩之勞。或提封百城。以經于大河之北。或運策千里。以制于長淮之東。隄繇未平。民力甚敝。維爾

參主澤之是宣。邦計或遺。歲漕不登。維爾良夫。心畫之是濟。茲命列諫。聯於右曙。進郎秩於中省。率蹈台訓。以承于休。可夏文莊公集職方。負外郎閤。仲卿。可屯田郎中。知耀州制。勅。某資性矜嚴。當官盡瘁。荐更事任。屢易歲時。將涖近藩。對於便坐。俾正握蘭之秩。用增分虎之榮。善愛吾民。以答殊寵。刑部郎中充龍圖閣待制查道。可右司郎中。餘依舊制。勅。朕自祇薦坤靈。荐歷年所。考陟載行於庶位。甄陞宜厚於適辰。具官某。性本溫良。識惟清達。田朔近署。克遵慎密之規。典掌攸司。允著公勤之績。蔚有詞藻。頌其聲明。久稽茂恩。未副朝論。特進中臺之秩。式增內閣之榮。更勵誠明。表予眷待。可彭汝礪。鄱陽集韓晉卿。大理少卿。林英。鴻臚少卿。范子諒。倉部郎中制。勅。某等。大理掌治邦之刑獄。以察冤枉。以糾萬民。鴻臚掌治邦之賓客。以詔朝貢。以和遠人。倉部掌治邦之倉庾。以謹出納。以足邦用。皆以佐朕經邦國。安天下。任責亦重矣。爾等更踐中外。顯聞惟舊。敬聽朕命。尚克有成哉。可元蒙齋集劉炳。除金部郎中。李韶。除都官郎中制。勅。具官尚書郎高選也。非有資望。不輕授。爾炳。愿而和。爾韶。清而通。嘗為朕牧民。且登諸朝矣。青綾入直。班序寢穹。非徒為爾榮。尚其懋勉。異時稱為端平郎吏。惟乃之休。劉放。彭城集水部郎中王諤。可知濟州。都水監丞。

錢曜可水部郎官制。勅具官某等。臺郎重選。郡守優寄。朝廷待材用之宅。兼仕官之美。是皆雍容內外之望。用爲更互出入之地。以諤效官文昌。旣歷歲月。俾分符竹。往臨鉅野。以曜領護都水。丞事修舉。進升省闈。仍莅起曹。勉副茂恩。力圖來效。可。朝散郎守兵部郎中程博文。可太府少卿。承議郎陳次升。可兵部郎官制。勅具官某等。太府主貨賄之藏。司其出納。夏官主五兵之要。謹其符籍。貳卿副郎。皆精選也。以博文繇歷省闈。綽著士望。以次升臨按淮甸。克宣使指。並用登進。以摠材略。夫其厠惟月之班。聯應星之象。爲寵多矣。爾其勉之。可。周麟之海陵集。莫伯虛除刑部郎官制。朕忱念庶獄。救寧嘉師。其斷治旣屬之理官。例成又聽于司寇。郎曹所領。責任匪輕。爾以明允之資。通法理之事。周旋棘寺。踐歷三官。是必能習察獄之麗。知播刑之迪者。俾升憲部。用展爾長。決讞則詳審其重輕。理寃則深求其情僞。爾無俟訓。尚勉之哉。路彬除刑部郎官制。朕擇吉人。以觀于五刑之中。惟時秋官。實掌邦禁。郎吏之選。非才莫居。以爾法理詳明。輔之文雅。擢在棘路。逾三十年。自評而丞。一再爲正。又嘗五易憲車于外。轍環於湖廣江漢之郊。茲圖老成。入踐省戶。使汝持議之際。不減平反之時。斯爲祥刑。朕不多告。胡~~某~~除兵部郎官制。朕耀德以爲威。

安民以爲武。任賢以爲折衝之具。戎部雖設。殆同清曹。握蘭者優游乎其間。非老成謹厚之士不畀也。以爾業履純茂。多所踐更。自蜀趨朝。贊事外府。久攝承于夏官之屬。爰嘉乃績。就命爲真。立武之常規。與除戎之大戒。載在古訓。非儒者不能知之。往思悉心。以助而長。李庚除兵部郎官制。文昌列曹。雖受察于御史府。然郎官著位。實居六察之右。或自臺而升省。或繇省以入臺。二者均謂之遷。惟才無所不可。以爾器範清穎。士之譽髦。敏於事爲。果達而濟。頃以公薦。序于憲僚。既升三院之聯。彌聳一時之望。輟自我豸。畀之握蘭。時方弭兵。戎政簡矣。若夫正邦之大法。立武之常經。職在司存。有不可廢。昔之所察。今之所爲。委任不殊。往其懋勉。可褚籍除工部郎官制。朕用人之方。惟器是適。謂賢者不可以一職拘也。苟才有餘地。必使之踐更於臺省之間。以爾質直而文。心貌俱古。蓋一鄉之所謂善士。在時論亦以爲通儒。回翔臺僚。既已久矣。序于郎吏。孰曰不宜。夫三院之聯。六曹之屬。皆選也。惟前日之察人。與今日之察於人。爲少異耳。其事雖異。其理則同。毋謂次遷。不廩于績。可。陳相除左司郎官制。中臺本天下之政。六職治其繁。而都司總其要。典領至重。在乎得人。以爾邃雅而文。達于世用。司我輿駕。舊爲望郎。贊謀樞庭。再踐厥屬。識慮精

審備見於斯。肆以汝遷。升于宰掾。惟慎密足以彌綸。省闈惟詳整。足以糾正諸曹。爾所優爲。奚俟予訓。王晞亮除左司郎官。黃祖舜除右司郎官。制文昌天府庶務之淵。分之以六官。而總之於宰士。凡自部而上之省者。無不關焉。蓋所以佐丞轄而理曹事。自昔多以周材之敏識。望實之俱稱者爲之。今吾尚書郎如晞亮之精詳審明。如祖舜之爽達彊濟。皆宿儒也。或久與典選。或屈於司儲。爰嘉已試之能。並正彌綸之任。夫省闈乃要地。都官爲劇司。惟得其要。在於提綱之間。則居其劇。無不迎刃而解。往承厥叙。益究汝心。洪平齋集。周操都絜。並除吏部郎官。季南壽除考功郎官。張孝祥除禮部郎官。制中臺號政本。六屬分郎。闡吏禮二曹。尤爲高選。朕屬精庶務。思有實才。官人之方。先試其攝。及此試可。從而類升。蓋操也以積學師賢。關潔也。以通才貳工監。南壽辭林之秀。孝祥舉首之英。久在石渠。校讎祕籍。今並以兼官之舊。錫命而爲真典。銓者當兩選之繁。考績者据七司之會。隸南宮者有舍人之目。各踐厥次。毋隳爾成可。工部郎中鄭寅除尚左郎官。制勅具官某。良以止爲體。能時止則止。然後能時行。則行爾簡粹而通亮。爲郡嘗以治理効聞。顧時俗之流從。又孰能無變化。懼荃蕙之俱茅也。而恬然歸絜。坐玩歲華。待化機之轉移。偕衆正而

彙集其將有行乎。郎選甚高。毋憚于劇。朕方思所以進爾者。可。考功負外郎。桂萬榮。除尚右郎官制。勅具官某。比歲倖門開。而吏道雜。武級猥濫。尤甚。綜核方嚴。銓筦宜允。爾爲考功郎。氣嚴詞厲。吏莫敢欺。推是以修審官。西院之法。鑒揭而妍醜分。衡設而輕重判。劇曹其澄乎。來幾何日。三錫厥命。用惟其材。毋謂序進。可。袁蒙齋集。趙汝遇。除軍器監。趙必愿。除戶部郎官制。勅具官。除戎器。戒不虞。義著於萃。不傷財。不害民。訓垂於節。而吾聖門講明實學。有勇知方。子路能之。治賦足民。冉求能之。皆確然有可用之實。爾汝遇之。謹重職在繕戎。爾必愿之。明練職在理財。一爲監長。一爲郎曹。其足食足兵之所深賴乎。治兵而毋佳兵。治財而無蠹民。此則聖門之所尚。而宗英之所以培植宗社者也。懋哉。服我休命。唐白居易長慶集。奉天縣令崔鄩。可倉部負外郎。判度支案制。勅奉天縣令崔鄩。大凡南宮郎。無非慎選者也。况官之屬。有堆案盈机之文。有月計歲會之課。故負郎不可逾時闕。不待滿歲遷。事劇才難。斷可知矣。而鄩自操白簡。宰赤縣。繩舉違謬。惠養鰥寡。皆有善聲。著于官次。豈能於彼而不能於此乎。爾宜率廩人。佐計務。決繁析滯。期有可觀。可依前件。宋夏文莊公集。三司鹽鐵副使刑部負外郎段曄。可吏部負外郎。餘如故。勅國家覃慶汾睢。于

茲六稔庶官大校咸用陟明繁劇宣勞特宜疏寵具官某等操履端肅器
 局淹通貳乃計臣度茲邦賦籠山澤之利公家之用咸充積歲月之勤鈞
 考之文未至用特進於賞典俾俯勸於能臣祇荷寵章更思况瘁可王
 旦弟度支負外郎判國子監旭可尚書司封負外郎依舊制勅某有帝
 降衷賚予良弼交脩封祀之典宣臻揖讓之治佑我鴻業格于皇穹哀哉
 云止追悼何已眷乃同氣素有令名避金穀之要司總膠庠之學館賞延
 之寵宜異于常勉繼前脩式光華緒可屯田負外郎同判定州張楫可
 都官負外郎餘如故制勅某朕以郡縣之治責在庶官三年有成急於
 加賞故有就進爵秩以勸勤勞者也以爾業文中選厲節首公關決郡條
 熟習吏事有司會課善最居多建禮增榮命數滋重勉思幹裕以答寵靈
 可屯田負外郎監荆南鹽麴商稅務陳易從可都官負外郎餘如故制
 勅某等有虞氏之制三載考績黜陟幽明朕舉而行之以勸臣下以爾
 等服勤官次各有吏能校課最於攸司上闕閱於宰府宜進文昌之秩或
 升中御之丞各荷寵靈更圖來効可新差荆湖北路提點刑獄太常博
 士江嗣宗可屯田負外郎餘依舊制勅勞臣不進材臣不勸故朕宣明
 考績甄序流品以爾具官某等服勤官次引籍朝闈綽有政能多歷年所

爰觀陟狀。用錫寵章。司輿建曹。墾田列職。臺郎之選。於是爲優。勉竭乃誠。無忝休命。可。太常博士知廣德軍陳覃。可。屯田負外郎。餘依舊制。勅。某等古者以尚書郎主屯田積穀之事。以充經用。國家頗重其選。未易授人。今爾等辭藝該明。吏事周敏。在劾可紀。會課居多。以升厥官。更佇來効。可。太常博士知眉州劉忠正。可。屯田負外郎等詞制。勅。某等漢魏以尚書郎主墾田虞衡之事。分曹建禮。職亦甚重。以爾等清潔秉志。勤勞首公。或守郡坤維。或詳刑嶺表。皆以吏課列於有司。考覈以聞。陟明斯在。第陞華序。用勸朝倫。欽踐厥官。更思况瘁。可。太常博士充祕閣校理韓義。可。祠部負外郎。餘如故。太常博士胡淳。可。屯田負外郎制。勅。文昌政化之本。臺郎要近之官。儻非特材。曷稱朝選。以爾韓某。執文深厚。躬博雅之姿。胡某。吏理精詳。懷青白之操。並處曲臺之秩。或叅祕館之榮。第課當迂。賞勞斯在。宜分曹於建禮。俾應宿於太微。勉勵清修。無忝朕命。可。胡文恭公集。關詠可。屯田郎中。趙秉可。職方負外郎制。勅。具官某等。夫治以得人爲本。而守長尤難。官以稱職爲賢。而名實湏允。我疇吏伐。第進省曹。胥獲美才。咸進褒典。以爾詠性度閑遠。履尚清修。以爾秉識致疏通。志用開敏。率自雋良之舊。屢試劇煩之能。進服臺聯。外握符寄。虔我典刑之守。濟

于文雅之風。或海沂以康。賴堤闕之利。或徼外無撓。濟遠夷之安。列上年庸。稔於朝聽。正以墾屯之秩。職諸方貢之宜。並號名郎。且旌良翰。益樹終更之課。勿忘甄陟之恩。廖詢可都官郎中。馮振可都官負外郎制。勅其等。朕設課吏之格。較比民之績。申唐虞之簡舊。去漢魏之煩密。均用一閏。參比衆功。爾等體行清修。風力強濟。自服王官之序。屢試吏資之能。分握符書。臨長藩服。上計文而可紀。應考法以當遷。宜正秋臺之聯。進丞郎省之務。取稱掇官之典。勉修良翰之風。章慘可屯田郎中。趙永裕。張肅。並可屯田負外郎制。勅具官某等。孝宣之治。信賞而衆職理。京房有言。舉功而萬化成。政平吏良。繇此物也。朕率由舊典。詳試庶工。褒勸勤庸。以風內外。以爾慘行義深篤。以爾肅風節清修。以爾永裕出舊德之門。有名駒之質。並奮繇士彥。而稔服朝聯。典城臨民。涖官行政。節以廉著。治用最聞。列上年庸。胥膺考法。中臺之選。起草爲華。右曹之煩。墾田居劇。或進正負之重。或峻副郎之選。並寵清流。茲爲茂典。益圖敏政。庸對陟恩。郭亨。吳迪。並可比部負外郎。寇玘。李咸熙。並可國子博士。張承慤。可水部負外郎。張景純。可國子博士。張仲莊。可太常博士。馮溫舒。可屯田負外郎制。勅其等。昔堯以職而試。臣漢用法而課。吏咸責實以觀效。亦累優而取陟。

以爾等。士矩尤飭。吏文滋習。謹政條之賦。則嚴而不苛。裁事局之繁。則敏而能力。績成所治。章下有司。較閎閱而信然。稽功令而審若。差進中臺之秩。參服上庠之聯。資地本優。儀品兼峻。往踐乃職。彌懋爾勤。宋元憲公集尚書屯田郎中知衢州胡晏。可尚書都官郎中。尚書駕部員外郎知慈州涉績。可尚書虞部郎中。尚書比部員外郎知巴州陳甫。可尚書駕部員外郎。太常博士知蒙州田瑜。可尚書屯田員外郎制。勅具官胡晏等。故事南宮郎專治臺務。國朝均內外之任。率真拜而煩使之。亦既有遷。尚本其次。以爾等咸服士操。胥濟吏文。荐歲結勞。登朝有著。分掌州任。參穆化條。前勤著聞。今治通舉。合是課目。愜予褒章。都隸朕虞。僕駕田部。或正或貳。勉即厥官。可尚書虞部員外郎馬尋。可尚書比部員外郎。太常博士張泌。可尚書屯田員外郎制。勅具官馬尋等。夫臺郎始於墾田。省書總於鈞比。皆一時之俊選也。以爾尋。効智肅給。持法敏詳。而嚮守軍牙。有緣飾之政。以爾泌。屬辭辨麗。秉操廉約。而游腰縣組。有撫字之勤。並見考歲成來結官。最宜階承務之劇。且勸叙才之規。往服寵嘉。毋怠祇飾。可太常博士通判定州馬僑。可尚書屯田員外郎。國子博士知濱州盧南金。可尚書虞部員外郎制。勅具官馬僑等。或俊茂服官。或淳固宿業。各敏乃事。

序登于朝。擢者輟貳邊麾。假領州祭。雖新莅未久。而前課已周。宜疇三歲之績。並允一臺之拜。體余郎選。勉爾吏勤。可。國子博士郭長吉。可尚書虞部員外郎。通判西京制。勅具官郭長吉。業治儒經。仕優官簿。早階郎署。協布郡條。失於保任。遂罹降斥。屬郊恩之蕩。蒙加京守之薦。能俾復典虞之曹。往參主鑰之政。悉心營職。以稱所知。可。尚書職方員外郎知衡州任旦。尚書職方員外郎監衢州清酒務郭昭著。並可尚書屯田郎中尚書虞部員外郎。通判廬州陳執方。可尚書比部員外郎制。勅具官任旦等。各以吏能參真部選。或州藩為政。頗迪惠和。或權酷示譴。已淹時序。並通前績。偕集攸司。正秩員外。清曹劇選。案名即授。尚勛官成。可。尚書都官中郎知處州黃禹昌。可尚書職方郎中。淮南路提點刑獄尚書祠部員外郎制。勅具官黃禹昌等。朕以較吏之法。責于攸司。官無內外。三歲一考。循課即授。褒勸在焉。以爾禹昌。勤身蹈和。白首無懈。以爾越。小心絜矩。清猷彌劬。並累書閣簿。參真郎闈。或華祭為州。藉教條之熟。或赤車案部。副欽恤之懷。率以年庸。愜我朝獎。陟司方志。貳度國征。往服寵階。尚結來最可。應賢良方正科太常博士蘇紳。可尚書祠部員外郎。充通判。應茂才異等科張方平。可秘書省校書郎。充知縣制。勅具官蘇紳等。國家振

復賢科。咨求邦彥。非以角空文於無用。蓋將佇遠猷之斯告。膺是選者。不其難哉。以爾等抗志經墳。沈精道素。或昌辰委質。已列於朝。綏或別都。論秀游偕於計物。並能貫穿前載。發揮大猷。溢奏牘以獻文。藹薦章而署行。爰臨便坐。躬覽著篇。雖異等之未躋。亦洽聞而可錄。茲馬第賞。誠協育才。噫。結華緩以陟郎曹。褫野中而登祕省。贊條外闡。字俗邇封。併示寵章。勉永來譽。可劉放。彭城集朝散大夫。權知曹州。王彥韶。可衛尉少卿。朝奉大夫。駕部郎中。張脩。可鴻臚少卿。朝散郎。蘇注。可司封郎中。承議郎。太常丞周秩。可駕部員外郎制。勅具官某等。中都列官。皆有分職。地崇望高者。卿寺郎曹也。非其美材。未嘗輕授。以某等持身端直。臨事詳敏。外典州郡。內更臺閣。久次成效。皆有可紀。是用遞加寵進。以極智略。或伙貳。惟月。或上應列星。至于副郎。並爲茂選。敬服寵光。敷懋職業。可曾鞏。元豐類藁。范子奇。工部郎中。高遵。惠員外郎制。勅具官某。宮室城隍。程匠度材之事。郎於起部。其選甚高。詢求在廷。爾材惟允。朕方董百工。而康庶務。爾尚勤夙夜。而能厥官。可范石湖大全集。提舉兩浙東路常平茶鹽公事。周閔。可戶部員外郎。總領淮西財賦制。國家謹供軍之制。特全師所營。必以王官持節。護饋饗。寄朕耳目。分國顧憂。班序甚高。舉在。凡奉使命。大夫上以

爾詳明練習籍有才譽乘軺東部席固未溫進輝郎星將我使事。調度密則軍不乏興甘苦均則士有奮志繫汝之職往其欽哉。洪平齋集川秦都大茶馬桂如琥除戶部員外郎制。勅具官某尚書郎非民庸暴白不授矧地官之屬選高而劇可輕乎。爾將漕于夔就建帥聞不苛急以牟利不矯異以干名。刀耕火種之民悉安之。朕惟推牧畀節以示獎勵孰與入奏明光之爲密式。遄其歸贊我邦計。凋窮若何而裕。煩冗若何而節。幣輕物重。若何而權。推此類具言之。用觀爾韞可。沈氏三先生集都官員外郎楊異等。可並職方員外郎殿中丞李之純。可太常博士。屯田員外郎張宗雅。可都官員外郎制。勅某等朕綜核名實信賞必罰庶幾乎吏稱其職民安其業如漢之全盛時故考百工之績而陟降之。未嘗不詳且慎也。今有司以爾等伐閱之狀來上咸應于法而無殿者其可以不賞而陟之哉。其各增秩一等。尚書副郎秩宗博士皆清選也。其各懋之。與我同底于治。可。鄭起潛立庵外制。藁朝奉大夫尚書考功郎中兼宗學博士胡泓除吏部郎中朝請大夫屯田郎中丘迪嘉除兵部郎中通直郎行都官員外郎陳昉除刑部員外郎。承議郎權發遣處州葉秀發除屯田員外郎制。太微後一十五星尉然曰郎位尚書郎重矣。雖事有繁簡而位望等也。爾泓以

宿學該深。繇司績陞右銓。爾迪嘉以長才練達。繇司田晉戎部。爾昉以雅望靖共。繇司隸陟士師。爾秀發以通儒理効。繇郡最入農部。惟茲四人。一朝而並命之。諸曹之事舉矣。往欽哉。思稱朕選擢之意。蘇魏公集職方負外郎。夏旻可屯田郎中。駕部負外郎。俞康直可虞部郎中。散官如故。虞部負外郎。鄭諤可職方負外郎。散官如故。虞部負外郎。散官如故。虞部郎。國子博士。傅共可虞部負外郎制。勅具官某。周之六廡。唐之四善。皆天官比吏之法。今之考課參用其制。視功賦祿。厥惟舊哉。以爾蚤聯閨臺。稔服吏政。一官恪次。四載于茲。治以最聞。行無過事。稽於有司之令。應被增秩之條。勉服忠規。以對休命。可。職方負外郎。陳傳可屯田郎中。虞部負外郎。孫昱可比部負外郎制。勅具官某等。考陟之典尚矣。自有虞以來。未之或廢。蓋疇能比吏勸功賞善。有國之法。不可闕焉。以爾等委質策名。居官任職。民政有拊循之效。郡網藉關決之明。稽勲四期。嘉事勞之可錄。進班一等。亦疇勸之所存。服我恩榮。終其報稱。可。駕部負外郎。李茂先可虞部郎中。屯田負外郎。馮積可都官負外郎。虞部負外郎。蔣僅可比部負外郎制。勅具官某等。昔有虞之熙衆功也。九載而能否別。周官之比羣吏也。三年而治最陞。夫授方任能。校功書過。久則實已廢。速則賞

或僭四歲遷黜。我得其中。以爾等夙以吏資仕于朝廷。自登郎選。屢試政條。率職之勤。訖無曠事。議年之課。且應功書。並進等於右曹。示疇能於往效。尚思勉懋。無忘欽承。可。遼山縣令賈祥母。著作佐郎周綸母。並年九十一歲。封縣君。南宮縣令董京父。年九十一歲。可守祕書省校書郎制。勅。某向者已事泰壇。均釐列位。厥有親年之老。未登封賞之科。特霽殊私。式彰孝治。以爾壽康之福。寔應詔求慶善所終。誠宜表顯。寵以蓬丘之列。湯邑之號。用爲子舍之榮。益保餘齡。無忘休渥。可。沈氏三先生集。太常博士郭琪。可屯田員外郎。殿中丞劉介。可國子博士。贊善大夫石弁。可殿中丞。國子博士王諤。臣。可虞部員外郎制。勅。某等書曰。知人則哲。能官人。蓋堯舜之所難也。然所以能使百僚師師。百工惟時者。非有考績之典歟。今夫外廷之士衆矣。固未嘗人人而從容乎朕前也。然則安得人人而辨之哉。故祖述唐虞。憲章三后。所以損益審官之法。甚備。庶幾乎黜陟之明。勸沮之信。而在位者。皆得其材。今乃以爾等來上。皆應其法。而當遷者也。朕甚嘉之。其各遷一等。徃服新命。毋忝我不顯之訓。可。宋景文公集。王球可工部郎中。張叔詹。盧安。並比部員外郎制。勅。王球等。或風尚開爽。或理懷脩舉。並宣力繁鞅。績用屢升。陟狀鉤校。年庸茲久。格有成例。朝嘉爾

勞。况吏二千石。朕所倚辦。就膺進秩之典。皆竚報成之良。正局外曹。官以差進。可。鄭獬。郎溪。集職方郎中。馮沆。致仕。一子可試校書郎制。爾之父以忠潔自脩。白首不懈。引章言老。請佚其餘年。詔音財及。而奄已淪謝。加賜一子。庸示朕之茂恩。可。敦遣人韓盈。可試校書郎知縣制。刺史言爾行義甚高。鄉里師之。善積于家。而賞行于朝。古之道也。其以某試蘭臺校書。爾其勉。敕不懈。以師其民。俾至於爲善而後已。則於時豈小補也哉。可。素蒙齋集。蔡仲龍。除祕丞兼屯田。杜範。除祕書郎制。勅具官。十洲蓬島。號風月不到處。職爲丞郎。儒者高選也。爾仲龍。夷雅自將。爾範。端方有守。蔚然令聞。士論推之。同時登瀛之榮。豈汝私哉。朕率厲群工。治事于局。木天雖無吏責。經史皆實學也。及茲暇日。培植器業。如或知爾。舉而措之。乃罔後艱。劉行簡。茗溪。集劉才邵。除祕書丞。李百藥。祕書郎制。勅具官某。冊府士之冀北。追風汗血之駿在焉。識者朝暮而取之。無留良也。爾等召自外服。問以所知。論議切理。有當朕意。丞郎之職。其選甚高。往屬爾脩。以俟識拔。可。蔡端明。集李評。殿中丞。宋敏修。太常博士。楊慥。奉禮部郎制。勅具官某等。天下以文治。而士人以詞進者。爲日舊矣。惟爾評。生於貴戚。早聞善訓。綴學屬文。特然有立。敏修。暨慥。世以儒聞。能名其家。經術益

茂命試列等。粲然可觀。或迂殿省之聯。或與奉常之列。率爲恩渥。勉務敦修。洪平齋集歸順人同鼎武翼郎。王聞顯武翼大夫。呼延實求伯友。修武郎制。勅具官某。國家推天覆之仁。舍逆取順。豈以南北爲間。爾等執羈綫以從。亡虜途窮力屈。束身歸命。朕不汝棄也。易畀武級之勞。毋忘忠力之報。可。吳泳鶴林集張文用授隨龍武經大夫。王倫授保義郎。董有恭授武翼郎制。勅具官某。阜陵之書。如天球弘璧。歷代寶之。以爲大訓。經筵進讀。今已終篇。恩光所霑。下逮而屬。旣優旣渥矣。爾其敬謹于儀。往祇厥事。毋曰一官可以幸得也。可。楊鳳孫授中大夫。楊蕃孫授朝奉大夫。楊衍孫授朝請郎。楊纘授朝請郎制。勅具官某等。昔我文母。保佑朕躬。有大功於天下。今升自閔宮。祔于太室。咸畹內外。嘉與推恩。蓋報其親者。不敢弗盡也。爾等生自高華。素于富貴。有敬謹威儀之度。無康好佚豫之失。竝升一秩。宜懋厥官。毋曰居寵而不思危也。可。慕容彥逢擢文堂集西寧州教授。歙州進士黃庭瞻。可將仕郎。樞密院關。黃庭瞻吏部供到。今年七月內。奉聖旨。西寧州蕃學。措置就緒。其蕃族子弟。甚有能書漢字。通誦孝經。漸習論語。皆知嚮方慕義。化革獷俗。所有蕃學教授黃庭瞻。與假將仕郎。以爲訓誘。不倦之勸。本部取家狀未到。未曾給付身。奉聖旨。黃庭瞻。持

與將仕郎仍疾速出給付身制。勅具官某。朕建蕃學于西寧。既克就緒。爾以進士預講授之選。訓誘爲勤。今蕃族子弟。能通書文。誦習儒典。嚮方慕義。俗由化革。雖朝廷聲教所暨。爾預有勞。宜錫官榮。昭示勸獎。欽承恩命。尚其勉哉。可。宋元憲公集十二考人前明州錄事參軍劉愿。可大理寺丞。奏舉人前渭州司理參軍張京。可著作佐郎制。勅具官劉愿。各以塵廉。參于調補。或郡綱督罰。通續前勞。或州獄首公。見稱敏識。閱其吏啓。嘉乃官成。宜從振滯之條。兼懋舉知之格。省僚寺屬。勉服榮階。可。十二考人前權楚州團練判官高中正。可大理寺丞。奏舉人前江陵府節度推官劉湜。可著作佐郎制。勅具官劉湜等。咸繇吏資。早介戎幕。或風力清劬。見舉所知。或勞考優深。載符允令。得于銓啓。嘉乃官成。秘局刑司。各備其屬。可。十二考人前鎮國軍節度推官知鄜城縣宋宸。可大理寺丞。奏舉人前權岳州軍事判官監納潭州茶米場陳選。可著作佐郎制。勅具官宋宸等。比者作爲恩格。差次使勤。銓覈有條。陞獎惟叙。以爾等屢由選集。出補賓從。或假以縣章。積資於功狀。或蒞乎茗稅。見保於監司。宜懋乃勞。改躋優秩。佐郎丞率。分以命之。可。十二考人前權保大軍節度推官張從宜。可著作佐郎制。勅具官張從宜。久調中銓。屢賓外府。近援赦格。歸質

歲勤繫書考之滋多。顧振淹而有序。宜緣信賞。俾陟榮塗。勉昨蓬丘之華。更圖縣綬之舉。可蘇魏公集奏舉人前陝州陝縣尉常景。可光祿寺丞。奏舉人前晉州趙城縣令安壽。可著作佐郎制。勅具官某等。郎內閣丞。蘭臺遷佐。皆京司之美官也。繇選部而陞者。非詞學之科。與公卿之世。不得預焉。以爾等仕於縣邑。或令或尉。皆有善狀。稱於知己。中銓考實。便坐推恩。各用爾資。進增厥秩。既蒙獎擢之命。宜盡公忠之心。可。大理寺丞李得臣。可守太子中舍。光祿寺丞吳立禮。可著作佐郎制。勅具官某。爾籍隸京司。職更民政。廉方之守。既已效於官成。累久之勤。茲亦應乎功令。宜甄疇於善最。俾叙進於榮資。爾其欽承。以永來譽。可。前虢州虢略縣令錢公績。可大理寺丞。前代州軍事判官張佑。前權知果州團練判官鄭士衡。可並著作佐郎制。勅具官某等。今之仕於郡縣者。既限以積累之資。則其器能可見矣。又難以保任之法。則其操守可知矣。會課來上。閱實靡差。真之京司。是謂慎選。以爾等或起於門調。或進自儒科。典邑佐州。咸有善狀。廷尉之屬。蘭臺之聯。皆曰美官。俾之並命。偕此榮路。益思後勤。可。袁州分宜縣主簿前虔州受納板木場兼監排岸司劉最。淮南節度推官前知鄆州中都縣事王仲安。可並大理寺丞。劔南西川節度推官前知梁

山軍梁山縣事趙清。可著作佐郎制。勅具官某等。或決科從仕。或延賞入官。並有廉能之資。綿更縣邑之課。臺章言狀。銓筦條勞。辨職者敏。幹可稱。字民者拊循著效。用擢京司之列。茲爲貴仕之階。勉思後勤。勿渝素守。可。前權潤州觀察推官方仲謀。前山南西道節度推官郭子彥。可並大理寺丞。前權虢州軍事推官譚仲衍。可著作佐郎制。勅具官某。士之由選部而陞京司者。榮進之階。漸也。非計最如格。未嘗輕授。今薦者以爾有幹蠱之譽。而有司又言應陟明之典。臨引便坐。擢爲王官。爾其益思登進之艱。終圖遠到之效。副我甄任。不亦休哉。可。張廣東憲集張闡。范雱。並除秘書郎。內張闡兼史院檢討官。趙衛錢周材。竝除著作佐郎制。勅具官某等。朕廣儲英髦。實待器使。石渠東觀。咸以次陞。譬猶合抱之材。長養成就。豈一日之積哉。以爾闡爾雱。問學之審。詞藝之工。朕故使之典四庫之書。以資其博。以爾衛爾周材。器識之遠。行實之孚。朕故使秉太史之筆。以信其公。雖尚周旋三館之游。然亦曲盡一時之選。乃若編摩之助。教導之勤。各因爾能。尚賴餘力。許應龍東澗集徐雄。除秘書丞。史彌鞏除秘書郎。余元虞。除著作佐郎制。蓬萊道山。清華之選也。非碩學鴻儒。蓋不輕畀。以爾雄。剛毅有守。公正亡私。屢振職於成均。宜進丞於中祕。以爾彌鞏。安

恬不競。悃幅無華。旣爲模範於金枝。蓋掌圖書於祕府。以爾元虞。身端行治。學廣聞多。允爲冊府之英流。晉秉著庭之直筆。罔非吉士。允穆師言。茂對榮恩。益宏進業。胡文恭公集周偕臧論道杜濟。可並殿中丞。陸暮。可著作佐郎制。勅具官某等。以才辭之華。升豫俊級。以力局之敏。進列京司。臨長遠服之民。賦宣劇邑之譜。剗治無壅。控帶有勞。吏民便焉。歲月勞止。因稽齋伐之實。並從進秩之科。丞盾省者洵且華。佐吏觀者尉其美。咸自修勅。勿忝褒嘉。全余白祖。或李秉。可並大理寺丞。周復張熙。可並著作佐郎制。勅具官某等。朕欲選清能。拔寒素。故保任之法。專施監司。而課覈之方。一歸銓審。參覆不謬。褒陟乃行。以爾或奮繇才章。或進以經藝。豫籌大幕。領治一同。亦從尉察之司。往登筦榷之局。並委束脩之士。宜敷渥茂之恩。領著史筵。進丞法屬。悉近朝閨之陟。益宣公路之勤。杜誥可大理寺丞。張文告。可著作佐郎制。勅某等。或積資至幕。或被舉治縣。叅畫有補。撫字弗苛。監司薦聞。銓覆應狀。秘丘領著。讞寺爲丞。尚勉來課之修。以對陟恩之茂。綦愿劉濟。並可大理寺丞。韓標。可著作佐郎制。勅某等。或力文升科。或治經署第。習知爲吏之敏。舉遵行已之方。幕有婉籌。邑無逋事。薦書交於公府。滿課集於銓臺。擢佐修書之筵。進丞治讞之署。益

思勉勵。用對褒遷。李琦可供備庫副使。李瑊。李琚。李球。並可內殿承制。制。勅具官某等。朕以浚泉在詠。懷聖氏之慈。渭水興嗟。增逝者之感。眷言諸息。洽被遺恩。以爾等妙年自修。沖規可尚。參從貴里。分籍禁庭。懼蓼莪之在憂。服苴麻而居制。咸聞推慕。良足哀矜。覽遺表以泫然。稽舊章而允若。擢升使介。進陟班聯。恩乃究於外家。義無慚於前代。勉思樹立。姑務顯揚。李球可內殿崇班。李玘可內殿承制。勅某等。內寢之聯。視諸朝秩。外家之貴。體自朕躬。主於拜除。宜在優異。爾等戚苑貴種。仙李真枝。被長君退讓之風。承鄧氏法度之教。咸自脩綜。莫不柔嘉。久從班籍之編。名未稱小侯之立學。宜峻近庭之秩。且光左相之賢。往服寵褒。益思淑慎。孫用可左藏庫副使。王日宣可禮賓副使。王克讓任守素。毛永保。可並內殿承制。勅具官某等。夫護營卒。邏邊警。式遏外侮。通為兵官。稽歲勞。校軍最。差進茂秩。抑惟邦典。爾等膺材武之選。有力局之用。數更委使。見稱彊敏。齎伐自列。應書當遷。司帑別都。典客近局。或從著定之峻。而承音制之重。率由功次。咸用詔除。尚繫拊循。以底綏靖。任希夷斯庵集。曾煥秘書丞。李鳴鳳著作佐郎制。三館儲材。均為清職。六卿設屬。式重列曹。已試有聞。次遷惟允。爾煥優于文學。久服周行。爾鳴鳳蔚有詞華。嘗冠蜀

選。或貳圖書之府。或躋著作之庭。兼假郎闈。采昌賢業。其服寵光之渥。勉爲稱塞之圖。沈氏三先生集內殿承制。唐詵等。並可供備庫副使。內殿崇班張宗納等。並可內殿承制。勅。某等。天下乂安。方外無警。而兵之不試者久矣。材武之臣。寧復有非常之功。而敢希不次之賞乎。然方鎮存屯戍。邊圉有微候。拊字講輯。譏察誰何之勞。亦不可遺也。爾等竝以勇選。而領軍事。按藉以遷。或貳諸使。或承制二日。皆曰顯爵。其往祇服。益圖祈報。可。蘇魏公集皇城使向寶。可貴州刺史。依舊皇城使。內殿崇班閻門祇候段克。可內殿承制。餘依舊制。勅。具官某等。夫爵祿班等。所以待有勞之臣。勞而不圖。何以示勸。爾等咸以精悍之質。禦于疆堠之衝。能戢種酋。稟信威令。攬元臣之列。削述成效。以良多。爰嘉乃勤。遞增爾秩。或視專城之守。或承內著之聯。俾以寵名。益重邊圉。並爲優異之典。更佇撫綏之謀。可。左藏庫副使曹繼明。可供備庫使。西京左藏庫使雍規。可文思使。內殿崇班閻門祇候王文郁。可內殿承制。依舊閻門祇候。內殿崇班韓見素。可內殿承制。勅。具官某。夫仕者久而不遷。則才愚同滯。進而不以其效。則流品弗甄。今有司所以限年而校功。循階而進秩者。繇此道也。爾以材武擢于治朝。內外煩使之勞。訖無曠事。歲月荐更之比。已應陟書。稍陞等於

官聯。且疇庸於伐閔。往承恩渥。無怠後勤。可。宋元憲公集。殿中丞知單州
碭山縣王文英。可國子博士。太子中舍知真定府馮日宣。可殿中丞制。
勅。具官王文英等。國家多出中朝臣。以宰百里。蓋欲寵厥任。而惠綏吾民。
政苟有成。賞不淹晷。旣以勸善。亦俾久官。惟爾等。榮名儒家。效智公局。日
以謹飭。蹈于廉隅。修方累勞。遂列閭藉。比荷臺詔。出撫縣封。並能審諭教
條。弭伏愁歎。灼有善狀。列在攸司。因其大比之辰。且光即授之寵。經庠盾
省。分以命之。益勵乃誠。毋替來譽。可。殿中丞新差知温州平陽縣楊中
和。可太常博士。太子中舍張子元。可殿中丞制。勅。具官楊中和等。夫考
課之法。所以明淑慝。而叙功次也。馭厥群吏。存乎彛章。以爾等並服朝紳。
荐更歲籥。或經明有法。克邵素猷。或問調累勞。頗書善狀。屬茲大較。咸用
序遷。議禮曲臺。分曹盾省。各祇寵渙。無替令名。可。河東路轉運使尚書
兵部員外郎陳琰。可尚書工部郎中。殿中丞通判興元府李公謹。可國子
博士。太子中允直集賢院知鄭州呂公綽。可太常丞。太子中舍知明州奉
化縣陳世長。可殿中丞制。勅。具官陳琰等。夫冬部郎曹。冑筵師職。容臺
之卿屬。盾省之監聯。並爲華階。以叙能吏。惟爾等懿文典學。完行幹材。或
將漕使輶。或剖符寰郡。或倅承於州事。或撫輯於縣封。並質歲成。克厭朝

賞宜就增於榮級。且究懋於乃勞。成命罔私。余訓無忽可。尚書虞部負
 外郎通判益州楚經。可尚書比部負外郎太常博士知越州蕭山縣王簡。
 可尚書屯田負外郎殿中丞前知封州劉直溫。可國子博士太子中舍知
 漢州綿竹縣趙壹。可殿中丞制勅具官楚經等。尚書曹有比勾掌屯之
 負中朝臣有師庠盾省之屬。各著官簿。以陟吏資。惟爾等智效事經。藉引
 朝紱。或勤於外。補方贊郡條。或績乃舊勞。累先縣譜。並齎闕來上。質歲有
 周宜序美資。交獎成績。毋或懈位。以忝懋功可。尚書比部負外郎提舉
 兗州仙源縣景靈宮晁邁。可尚書駕部負外郎國子博士通判南安軍徐
 紹齡。可尚書虞部負外郎殿中丞集賢校理知復州王琪。可太常博士。太
 子中舍知鬱林州查冲之。可殿中丞制勅具官晁邁等。課功之黜陟。視
 勞之殿最。我有彛法。付之攸司。以爾等早服仕階。進班朝次。或華顛郎署
 或頰弁經庠。或文雅游書林。或廉端備儲案。並緣外補。參積歲勤。然方奉
 真祠。倅軍壘。守支郡。撫遐陬。宜即官成。序進恩等。今以駕曹虞務。蒞野盾
 省之屬。以命之。其各無忽。可。夏文莊公集利州路轉運使工部郎中呂言。
 可刑部郎中。餘如故。殿中丞同判鄧州朱正基。殿中丞知華州華陰縣事
 揚政化。並可國子博士。餘如故。太子中舍越州餘姚縣事韋覺。可殿中丞

餘如故制。勅國家引一代之材。布四方之政。省錄勤吏。日簡朕懷。以爾其等性蹈謙雍。治中寬猛。往監司於郡國。或撫養於黎蒸。咸能首公。克底成績。建禮司刑之重。東庠講學之榮。洎中御之屬丞。皆上臺之清舉。第勞而授。惟政是繫。無替厥官。以忝予命。可。都官郎中知邢州嚴穎。可職方郎中。餘如故。荆湖南路轉運使職方員外郎康孝基。可祠部郎中。餘如故。太常丞同判福州王瀆。可太常博士。餘如故。太子中舍知鄆州平陰縣事陳保和。可殿中丞。餘如故制。勅國家尊右文治。重愛生民。以臺省之要官。釐郡國之衆務。疾非甄善。唯恐後焉。以爾其等心識甚明。材用尤備。考其官闕。各有事功。宜舉成科。並增顯秩。爾其除煩就約。徇公滅私。勉繼前修。無替朕命。可。祠部郎中知宣州江嗣宗。可度支郎中。餘如故。屯田郎中知臨江軍熊同文。可都官郎中。餘如故。太常博士知岳州張稹。可屯田員外郎。餘如故。國子博士知榮州趙喻。可虞部員外郎。餘如故。殿中丞知富順監朱良治。可國子博士。餘如故。太子中舍同判眉州文可觀。可殿中丞。餘如故制。勅郡國朝廷之屏翰。牧守生民之父母。教化所自。選授至艱。勞之不圖。吏將安勸。以爾其等踐履方格。文劄詳明。或處千里之師。或貳諸侯之治。爰考官闕。率如風謠。宜郎所居第進榮秩。夫清約

可以行已寬厚。可以安人。勉逮前良。無替朕命。可。金部郎中知洛州李
 文著。可司勳郎中。餘如故。太常博士同判蘇州李意。可屯田員外郎。餘如
 故。殿中丞同判汾州馬張。可太常博士。餘如故。殿中丞同判鼎州甄化基。
 可國子博士。餘如故。太子洗馬知汝州襄城縣事乘允。恭。可殿中丞。餘如
 故。制。勅朕懋建郡吏。分幹中區。賞以及勞。爵以序德。以爾等矩度修絜。
 文禮精詳。考闕閱之所更訖。無痕殿量功次。而差授。並用甄陞。勉圖後勳。
 以永終譽。可。太子中允知榮州公孫儀。可太常丞。餘依舊制。勅。某等。
 竭慮首公。勤心幹裕。有司較其課最。宰府詳其闕閱。名在賞格。朝命是行。
 或引籍曲臺。或發辰中御。各欽茂渥。更勵乃誠。可。祕書丞同判延州劉
 訥。可太常博士。餘如故。太子中舍知揚州天長縣事徐善寶。可殿中丞。餘
 如故。殿中丞楚繼芳。可國子博士。權御史臺推直官。殿中丞戴融。可太常
 博士。餘如故。著作佐郎充北宅諸院教授王式。可祕書丞。餘如故。制。勅。
 具官某等。或詳曉政經。或兼該學術。服勤官次第。課可嘉進。秩朝闈。寵章
 斯允。更圖來効。以荅茂恩。可。大理評事唐均。可衛尉寺丞。餘如故。制。
 勅。具官某等。夙承勳緒。久踐仕塗。吏課有成。朝賞斯舉。震維引籍。寔擬於
 上臺。周衛陞榮。最親於中禁。勉服休寵。無怠厥官。可。唐南東路轉運使

司封員外郎李適。可工部郎中。職方員外郎知鄂州高慎交。可屯田郎中。祕書丞知岳州臨湘縣事張惟諤。可太常博士。祕書丞知洪州豐城縣事孟虛舟。可太常博士。太子中舍知信州上饒縣事賈守文。可殿中丞。太子中舍同判信州張同文。可殿中丞。殿中丞知白州劉宗諒。可國子博士。大理寺丞知宣州宣城縣事查慶之。可太子中舍。衛尉寺丞知湖州烏程縣事方仲弓。可大理寺丞制。勅國家敦厚治本。重惜生民。以臺省要官。長州縣衆職。復東良儁。式備監司。勤之可圖。寵爾殊等。具官某等。志尚清約。事任頗繁。往幹漕輓之權。或分守宰之寄。風謠載舉。善最有聞。並書厥勞。第增乃秩。勉遵寬大之詔。稱茲褒異之恩。思齊古人。以永休譽。可。殿中丞田慶餘。譚雍。並可國子博士。太子中舍。畢從善。可殿中丞。太常博士。同判揚州。吳待問。可屯田員外郎。餘如故。太子中舍知汾州平遙縣事李永世。可殿中丞。餘如故。衛尉寺丞知淄州淄川縣事李庭堅。衛尉寺丞監溫州前倉鎮茶鹽酒稅務向約。並可大理寺丞。餘如故制。勅以祿詔爵。以德懋官。順考舊章。無尚於此。以爾具官某等。政體勤曉。風行潔清。宜錄乃勲。遞增爾秩。式旌課最。昭勸官師。服此朝榮。更當自竭。可。胡文恭公集田化愚。可虞部員外郎。鄭偕。可太常博士。張當。可殿中丞制。勅具官某等。

夫守宰爲任。最親斯民。政伐有成。宜疇吾賞。以爾等。或仕緣鄉物。或進藉世資。繇官次之累勤。自朝聯而進序。劔外班政。迹著不苛。寰內字氓。文稱無害。並用年勤之茂。合于功懋之科。升領澤虞典。司儀蒞。至于盾省之屬。並爲朝紱之華。就祇臺恩。尚圖官治。薛仲簡可也。田負外郎。蔣秘卜。仲可並太常博士。馬仲旦可殿中丞制。勅朕考內外吏職。筭計見效。累優以成陟。急賞以申信。故功懋者進。而節廉者起。具官某等。或奮從造秀。或蔭自官華。並服王官之箴。咸從朝著之後。更試政事。參訪行能。或典守列城。流豈弟之化。或長治劇邑。宣愛利之風。條上年庸。申校吏迹。在狀甚白。於法宜遷。超敘右曹。實墾屯戶口之掌。稍遷禮閣。有贊導乘輿之榮。至於盾省之聯。並號朝閨之美。往祇渥茂。勿廢操脩。丁宗臣可太常博士。丁寶臣可太常丞制。勅具官某等。國家試功之典。參任以職。考課之法。質成於閨。用甄美效。亦存至勸。以爾宗臣。吏資強敏。器質莊重。以爾寶臣。文典而蔚。才敏且精。是惟天倫。並入吾彀。所試有迹。厥脩弗愆。或鳴絃以字人。或剖符而守境。並時上計。据法得遷。入丞樂鄉。進掌儀蒞。悉號朝閨之美。足爲家閥之榮。就服寵褒。益思勉勵。路綸可虞部員外郎。汲熙載可太常博士。裴見素可國子博士。馬璟可衛尉寺丞制。勅某等。賓興以文。

入豫吾毅。或公家學之進。亦資世賞之延。稔服吏能。分從官使。關掌郡佐。參布縣條。領筭商車。通著最日。有司覆實。彛格應遷。司訓虞典。野蕞。至於經序之選。均為朝品之華。當思力公。勿為官忝。鄭獬。郎溪集。太子中允集。賢校理趙彥若。可太常丞。依前職制。金馬石渠。是為蓬山。藏室。殫見洽聞之士。於此而登公相者。班班而出。以爾之博學強記。守之以醇固。沈酣乎書林。蓋已久矣。丞貳奉常。茲為次補。搏風而翔。則在爾之所勉焉。可。宋景文公集。戚舜元可比部員外郎。陸仲息可國子博士。王逢吉。郭承祚。並可殿中丞。李從夏。侯錫。並可秘書丞制。勅。戚舜元等。三歲之限。天道小成。朕課吏勞。稽法於此。以爾等文敏強濟。業於官下。經營旅力。謹我詔條。事無瘦情。文不諉上。年比如令。朝次遞遷。省闈庠戶。芸簽盾局。資踐有等。褒進則同。各仍前莅。益昭來譽。可。唐元稹。長慶集。袁重光。雅州刺史。李踐方。大理寺丞制。勅。盧國郡。貫平羌江。帶邛峽關。西南蠻。經畧之地也。大理寺專獄。狴視刑書。我國家生人之司命也。任非其才。為患不細。前廊坊丹延等州觀察判官。侍御史。內供奉。賜緋魚袋。袁重光。佐觀風於廊時。聞有能名。前湖南團練判官。兼監察御史。李踐方。叅練卒於湘中。號為柔立。宜當慈惠之選。且盡哀敬之心。姑務勝殘。無或枉撓。佇爾布政。叶予好生。

重光可使持節雅州刺史散官勲賜如故。踐方可大理寺丞。宋元憲公集
 十二考人前權建雄軍節度推官張行成。可著作佐郎。奏舉人前南安軍
 錄事參軍慎晃。可大理寺丞制。勅具官張行成等。國朝考吏。雖黃綬一
 命。皆責在銓審。而覆于殿庭。矧厥累勞。固用稽實。以爾等。亟參調補。咸寡
 悔尤。或年老。應於赦條。或保任。列於公牘。宜從信賞。予以懋官。秘書卿曹
 各備其屬。可。十二考人前權保康軍節度推官田頴。可著作佐郎。奏舉
 人前陳州司理參軍孫准。可大理寺丞制。勅具官田頴等。間者詔書以
 吏久不遷。始限考法。才而可任。叅責舉知。蓋因方任人。非可以一故也。惟
 爾等。或從事戎幕。或訊獄輔州。年勤應條。薦狀符格。覆自銓啓。愜于余求。
 省屬卿丞。各服榮序。可。前權清海軍節度掌書記林杞。可著作佐郎。前
 明州錄事參軍錢訪。可大理寺丞制。勅具官林杞等。或士類美材。或王
 門遺緒。並沿官牒。久服銓流。杞以作記之工。載華戎府。訪以督郵之敏。流
 聲藩掾。薦能累牘。鈎課如書。蓬丘佐負。棘路分窠。各踐榮次。無忝爾知。可。
 大理寺丞通判邕州鄭史。可太子中舍衛尉寺丞知益州成都縣王景
 良。可大理寺丞制。勅具官鄭史等。補吏有資。施政惟敏。比緣卿屬之選。
 分任邊州之遐。或協贊守條。或懋成宰課。並緣歲滿。宜獎職勞。儲窠通閏。

法丞署局。各祇榮次。尚續來勤。可。十二考人興元府觀察支使張肅。可著作佐郎。奏舉人前真州錄事參軍張孝友。可大理寺丞制。勅具官張肅等。載名銓符。展體官次。或序才累績。委公車之封。或結課周星。無社陵之殿。並列在奏。籍應于賞。科蘭臺佐郎。棘位丞屬。勉服並命。思稱楸官。可。十二考人前益州節度判官尚頌。可殿中丞。奏舉人前權筠州軍事推官林高。可著作佐郎。前真定府錄事參軍張立。可大理寺丞制。勅具官尚頌等。夫中御之丞。列朝品著書之佐。參仕彥司刑之屬。選吏文階。敘材之榮塗。勸勞之優秩。以爾等。咸有成績。調于中銓。或年考寔深。或保任狎至。質諸功狀。符厥賞科。宜並命於華聯。俾陳力於來效。可。宋沈氏三先生集。奏舉人前真定錄事參軍李及。可著作佐郎。奏舉人前青州錄事參軍趙億。可大理寺丞制。勅具等。州縣之吏。以千數。吾未始一登進於前。而辨其賢不肖也。故命有司。考其推薦之多者。參質其殿取以聞。朕則親臨而擢之。夫豈不重且慎哉。今汝等其選也。或屬廷尉。或佐東觀。往悉乃心。以服乃事。毋俾有壞。以負我重且慎之意。可。奏舉人前同州郃陽縣令張于。可著作佐郎。奏舉人前權西京留守判官張宗說。可大理寺丞制。勅具等。天下士大夫達於朝廷者。吾既知之矣。彼州縣之吏。動以千數。卑

且遠矣。朕亦何從而辨之乎。故設爲薦任之法而取之。一有污敗。刑茲無赦。然則薦而任之者。亦已艱哉。今擢爾于東觀。宗說廷尉。竝列于王官。其往祇飭。保爾一節。毋辱于已知。毋背我官訓。可。蘇魏公集前權知雲安軍判官馮越石。前華州下都縣令張杲之。可並著作佐郎。集慶軍節度推官前知磁州文城縣彭天麟。可大理寺丞制。勅具官某等。士之由選調而陞京司者。如用外官之保任。加復有司之視成。最狀上聞。便廷臨引。訾相其質。敷納以言。然後命之。良亦艱矣。惟爾閎閱之茂。咸應斯格。有如辭章之美。並由科級而仕。擢以臺秩。俾爲王官。漸階通顯之塗。益慎進趨之守。可。周益公大全集右朝奉郎陳唐弼。主管官告院虞似良。並除大理寺丞。主管右治獄制。勅具官陳唐弼等。唐虞之時。畫衣冠而民不犯。然猶有欽恤之戒。况於後世。何敬非刑。爾唐弼彊明不私。爾似良脩潔自好。或賜對便坐。或拔尤周行。並丞士師。時乃簡擢。惟良折獄。尚忱念哉。可依前件。鄭起潛立庵集朝奉郎趙崇媿。除大理寺正。朝請大夫趙師呂。除大理寺丞制。朕承列聖仁厚之餘。於刑尤謹。乃者勒銘。以儆有位。廷尉天下之平也。其事重。故其建官。視他司爲詳。爾崇媿明習文法。三入李廷。宜爲正。爾師呂詳練民事。擢繇戎監。宜爲丞。欽哉。協佐而長。求惟厥中。以稱朕謹。

刑之訓。胡文恭公集魚周物王鄰臣。可並殿中丞。周端李格。可並太子中舍。崔宗旦。可大理寺丞制。勅某等官。令著最臺。賞有格。泛取三期之效。博勸庶工之進。爾等或得諸髦彥。或奮自經術。擢繇任吏之法。擢以讞丞之名。簽盛府之元僚。宰象雷之大邑。咸著善狀。悉上計書。鈞考信然。褒進爲允。殿局之尚。參掌名物。宮僚之貳。通受令旨。乃自法卿之屬。並爲官制之華。往服茂恩。益圖來績。前石州方山縣令王佐。可著作佐郎。前泗州盱眙縣令吳天常。睦州司法參軍前監温州在城商稅務傳燮。可並大理寺丞制。勅某等。久從掾令之職。咸有幹廉之稱。使者交章。攸司覆實。言爾最狀。甫應迂科。朕親御便廷。訾相其質。可以才使。因而敘遷。進屬上臺之聯。益思良吏之守。可。陸絳。可著作佐郎。張靖。聶堯。可並大理寺丞制。勅某等。邑大夫。司百里之命。郡督郵。秉一州之綱。二者之任。則均。三人之行。各異。以爾絳。名有幹局。得諸才旄。舉將爲多。治縣有迹。以爾靖。通法家之學。以爾堯。本經術之明。吏資並深。官簿無缺。終更赴集。鈞考應書。參丞理官。用信吾賞。有以自效。勿替厥修。郭評。可太子中舍。李偉。可大理寺丞制。勅某。春坊元僚。比東臺之封駁。秋卿丞屬。佐廷尉之讞疑。或額用才流。或參選吏幹。以爾等修辭入第。豫軍從事之招。治禮得

科。歷郡決漕之任。外章交薦。滿課終更。質諸銓條。灼有治狀。宜寵承華之
 秩。往司李法之書。彌勵來勤。勿更前守。晏詹可殿中丞。王登王康王允
 並可太子中舍。王獻臣可大理寺丞制。勅某等。或出曲旃之家。而材質
 自美。或佩滿籩之諺。而術學素優。踐王官之華。參從吏職之試。剖盤根
 而輒解。甘藿食以自清。驛上計文。臺中考法。稍遷中尚之局。進豫東禁之
 僚。並通朝闈。亦丞卿讞。咸在修敕。勿忝褒升。陳允可著作佐郎。邢裕可
 大理寺丞制。勅具官某等。漢之法。有最課而得遷。晉之令。坐優舉而乃
 陟。國家開薦任之例。委監司之官。擢敘則精。才否尤辨。爾等。或用材質之
 美。揚于王庭。或以經藝之優。縻我人爵。佩縣銅墨。為郡紀綱。治有愛利之
 風。官無逋曠之事。需章雜薦。選部修聞。領著秘丘。決平讞寺。並為盤陸之
 漸。勿忘風矩之修。周約可著作佐郎。郭灝可大理寺丞制。勅具官某
 等。同升茂士。分踐俊科。比訟牒以肆勤。識治庖之效智。樹風遠邑。綰務要
 津。政條以修。局事無壅。監司之薦。應法銓審之較。中科入著秘局。進丞讞
 寺。並居美秩。咸服茂恩。孫詔可著作佐郎。王師旦王震可並大理寺丞。
 夏侯維可衛尉寺丞。朱彭可大理寺丞制。勅國家著定考法。差進銓流。
 壹責監司之官。參稽保任之法。省審既正。遷陟乃宜。以爾等。或州舉升科。

或世資補吏。除軍從事。爲郡決曹。領筭商車。典臨茗局。職修課舉。行敏節廉。按察之薦。條聞鈎校之司。覆實書省。有佐卿屬。置丞。並從臺格之遷。益虔朝寵之茂。無易而守。更效其來。楚泰可大理寺丞。依舊直講制。勅具官某。朕選通經義。誦說有法者。勸導胄子。爾本學力自致。俊等。鄰因祭酒之薦。置在詳講之負。通敘外勞。亦已久次。雖中坐細故。而見稱大臣。參閱薦章。足驗素行。姑寵法卿之屬。仍敷學省之經。尚圖後行。毋倦惠訓。宋洪平齋集。葛逢除著作郎。劉炳除司農寺丞制。勅具官某等。漢良二千石。必選召。渤海入爲水衡都尉。潁川入爲太子太傅。左馮翊入爲大鴻臚。美意猶在也。爾逢脩潔。而寬厚守嚴。能使其民咸樂於有生。承明有庭進。爲之長。爾炳詳明。而通敏守微。能與其民相安於無事。司均有丞。俾還其舊。文學政事之科。雖異。表屬藩輔之意。則同。或汗竹之摘華。或治粟之贊計。各攄素韞。用對殊獎。可。趙疑除大理寺丞。陶木司農寺丞。趙崇岳太府寺丞。姚珪國子監丞。賈似道軍器監丞制。勅具官某等。漢宣帝屬精求治。綜核名實。以練群臣。黜陟有序。衆職修理。上下無苟且之意。迄濟中興。朕甚慕之。爾疑世業之華。器能精敏。爾木儒林之望。議論堅明。爾崇岳公族之彥。材諳通暢。爾珪決科之雋。講習有源。爾似道克家之美。趣尚不

苟廷尉大農太府有丞。冑監戎監亦有丞。往爲我分治之。丞者承也。所以承輔其長。使無曠職也。政事文學法理之士。雖自今咸稱厥職。則予以懌可。權知信州史彌恣。除將作監丞制。勅具官某。上饒間于江浙。項悍卒軼紀律。以駭吾民。翦其萌可緩乎。爾優於應變。勇於討惡。尸二渠于市。而群姦之魄。褫千里底定。朕甚材之。召丞匠監。用旌爾能。繕修務簡。益培雅望可。太社令李晞顏。除大理司直制。勅具官某。三尺法枉於舞文吏之手。朕甚憫焉。必得古之遺直。而後可爲邦之司直。爾詞藻有華。業履有度。所居官惟法守是謹。以是議法於廷尉。不撓不折。不僭不濫。而王道行。皇極立矣。枉已未有能直人。則孟軻之戒可。趙絀除大理寺丞。諸葛十朋除大理寺司直制。勅具官某等。獄重事也。鍛鍊以爲巧。攬摭以爲察。析律以爲密。深文以爲公。而民命近止。國脉斲矣。理官其可不選。爾絀器涵渾璞。薰然忠厚。長者之風。挈繩直於園棘。刑不失仁。故就進之丞。爾十朋步中規矩。藹然悃悞。無華之美。贊芴畫於國帑。利不失義。故俾繼絀。司邦之直。皆以達吾好生之德也。敬之哉。惟良折獄可。鄭起潛立庵集朝請郎直寶章閣。主管建康府崇禧觀。鄒伸之。除大理寺丞。朝奉大夫提舉福建市舶。劉克遜。除太府寺丞。承議郎行軍器監主簿。章端子。除司農寺丞。

制。廷尉刑獄之平。大農天倉之總。太府貢賦之貳。皆號劇繁。丞實贊之。爾伸之。詳練世故。宜贊廷尉。爾端子。明習吏事。宜贊大農。爾克遜。敷歷外庸。宜贊太府。爲官擇人。各佐而長。以審輕重。以稽委積。以謹出納。丞哉錢穀刑獄之政舉矣。汝不負承。朕有明陟。劉攽彭城集前河北提刑王端可將作少監。新差通判瀛州李敦頤。可軍器監丞制。勅具官某等。百工之事萃於二監。將作謹於撲斲。軍器嚴於補繕。非有程。不可以稽其勤墮。非精心。不可見其功贖。命官之重。從可知矣。以某刺舉時當。以某會計明審。推其有餘。允宜繁使。或丞或貳。寔皆寵命。勉力自強。以副推擇。可汪藻浮溪集張宗臣大理寺丞孔仲原大理司直制。臯陶爲大李。漢法罪人必正于理。豈不以獄者人之司命。固不可苟哉。今爾等有職於其間。蓋朝廷遴選也。其思欽慎。以對寵休。林光朝艾軒集俞澂除大理丞徐存除大理丞王夢若除大理司直制。具官某等。廷尉之屬。所繫爲不輕。惟廉平近厚者。則其所予奪無或差爽。爾澂貫穿諸律。於獄之成。則聽之。爾存練習古義。於獄之疑。則折之。爾夢若數隨漢使。不避勞苦。人情法意。何嘗相遠。爾其念哉。爾惟胥訓告。胥保惠。各以其職舉。則無負朕同日命爾之意。可任希夷斯庵集費埏大理正趙舉夫大理丞裘萬頃大理司直制。正丞

司直皆理官也。朕敬于刑，非明審者，不使之典治。爾埏爾懇夫，中外更迭已試，有聞爾萬頃志行安恬，不移所守，或遞陞於厥次，或特優於汝遷。雖一時訟繫之不煩，而四方奏讞之頻上，精加閱實，尚克勉哉。宋元憲公集大理寺丞知蘇州長州縣薛糾，監杭州糧料院杜植，並可太子中舍光祿寺丞通判海州石延年，可大理評事監徐州鹽稅務王諄，可光祿寺丞監霸州鹽酒稅馬湜，監潁州酒稅李熙政，並可衛尉寺丞簽署鄭州節判官廳公事王政路，可將作監丞太常寺奉禮郎監開封府陳留縣鹽稅務晁仲紘，可大理評事制。勅具官薛糾等，胄緒之良材，敏從政，率階京署，參服吏文，或化協郡條，或最聞縣普，或幕籌甚婉，或高利載登，並稽三歲之庸，宜陞一等之秩。儲察卿案，各楙乃官，可夏文莊公集太常寺奉禮郎監濱州鹽酒稅務陳崇德，可大理評事，餘依舊制。勅某等，素擅藝文，早籍勲蔭，並登仕路，各著吏能，勤勞有成，考較惟允，第加寵擢，用示陟明，勉稱厥官，以永休譽。可胡文恭公集武康可太常博士裴耕，馬先張應符，申屠會可，並殿中丞史珍，薛端，可並守太子中舍，李巽，可大理評事制。勅具官某等，朕日者右饗合宮，咸澤庶位，並甄一等之秩，用洽三神之和。爾等類皆曲恩，差進茂級，而滿課已上，於考格當遷，吏勞不可以外遺。王澤當令

於下究。並申後寵。匪隔前恩。往承朝綍之華。勿替王官之守。張師中可
太常博士游奎。可秘書丞。陳知德。可大理評事。制勅朕用。閏成之比。計
吏治之脩。雖官有大小之差。而法無內外之異。所以均朝賞。壹臺制也。以
爾師中材資粹美。風業脩舉。以爾奎南土之秀。以爾知德舊門之良。稔服
朝聯。升豫京局中幹事。職外握縣條來上勤庸。參應褒典。西京重於博
士。江左美於王官。至於詳讞之聯。並爲進陟之美。欽祇無忽。褒勸在茲。

永樂大典卷之一萬三千四百九十八

永樂大典卷之一萬三千四百九十九 二寘

制 除官制二

宋劉放彭城集承議郎光祿寺丞王愈可太常博士宣德郎呂由庾可光祿寺丞承奉郎王存可太常寺大祝制 具官某等九卿之屬效職輦轂皆朝廷之精選而養材待用之地也以愈學術通敏究知今古使爲博士可以綜練禮文以由庾持身謹飾紹其家世使丞光祿可以攸助卿事以存幼壯好學傳其父書使爲祝官可以陳信正辭並承休命所思圖報可胡文恭公集邢夢臣可秘書丞韓公彥徐總可並光祿寺丞杜子才可太常寺大祝制 勅具官某等朕分建庶工參濟群務謹旌陟之法示開勸之方計勞以升限年爲得以爾等或拔自俊茂或蔭諸高華率用才資雜治邑局所至職辦乃今官成稽參應書差次更秩進丞中秘豫屬內卿逮於祝史之聯胥服王官之次咸思自效勿廢聿修 孫薰可大理寺丞軍鼎可太常寺大祝制 勅具官某等奮繇蔭格服在京聯臨宰右蜀之民典幹別都之帑越從官次列上年勤適敦泛勸之方爰用稍遷之法讞丞進

秩。祝史陞名尚服。箴言交修節素。實彤王穆可並秘書丞。俞希及可太常寺太祝制。勅某等或以才令之選策於時髦。或以諷訓之修育自門子。參試以事。往服厥官。列郡之政脩有司之職舉。歲勞均著。朝賞懋推。宜承本省之清。往虔祝筴之告。勉而端節。服我褒恩。洪平齋集門下省檢正諸房公事辛克承除太府卿制。勅具官某。朕閱班簿。輒興才難之嘆。得非比年以來。抱有用之才。而鬱於頓挫。老於閑退者多乎。爾純實無華。廉靖不競。越在外服。治譽夙著。顧善刀而藏之。若將終身焉。朕方收召四方俊乂。以重周行。起爾宰士。又進爾治藏之長。豈以貨賄出納。爲足以煩吾老成哉。百辟卿士。媚于天子。不解于位。民之攸暨。尚求無媿於古。可直秘閣知温州游九功。除司農少卿制。勅具官某。良二千石。入爲九卿。漢法也。北海朱邑。以治行第一。掌周稷之業。蓋此其選爾。膚敏而靜。平易而立。京蜀荆閩。屢更名郡。剛不至孰。柔不至坏。民安其政。而有去思。可謂良矣。朕懲吏道放紛之弊。循名責實。思用其良。不俟東嘉上計。以漢法選貳司均。夫長於治民者。必優於裕國。信能爲朕養其和。節其流。而時斟酌焉。錢穀之問。其紓乎。可。秘書少監徐僑。除太常少卿制。勅具官某。禮者天地之序。樂者天地之和。夷夔不兼命也。而簞瓢陋巷之士。夫子遽以四

代禮樂付之何哉爾好古學行古道瞻彼淇奧其容比於禮考槃在澗其節比於樂朕方網羅衆俊聚之本朝老成典刑思見如渴擢貳蓬省翔而未集又舉奉常亞卿以進之時行則行幡然一來講明王道於玉帛鍾鼓之外以善人心視獨善有間矣母使朕有齊魯二生之歎可唐白居易長慶集裴弘泰可太府少卿知左藏庫出納制勅前度支河北榷鹽使朝議郎檢校尚書刑部郎中使持節貝州諸軍事兼權知貝州刺史侍御史充本州防禦使上柱國賜紫金魚袋裴弘泰九土之貢百品之貨辨其名物謹其出納常在外府統以上卿宜求幹敏之才以爲之貳而弘泰頃分權務兼撫郡民當軍興之時法行政立則受藏之府事繁物殷量其器能可以專委勉膺是任無替前勞可守太府少卿知左藏庫出納散官勲賜如故周益公大全集戶部郎中李安國除太府少卿湖廣總領不候授告疾速朝辭訖起發前去制勅具官某國家養兵百萬雲布於江淮荆蜀之間置治粟使者四擇列寺介卿若尚書郎畀之其在武昌者總六道八十里之賦任隆事夥甲於三方以爾有肅給疏通之才濟愛人利物之心是以明而不苛辨而不擾列屬版部有華厥聲擢佐司府往督餉道外計之重殆無復加夫衛民者兵也瞻兵者民也用不可以不足力不可以不裕

二者兼濟則予汝嘉。可鄒道鄉先生集向糾轉左朝議大夫。除司農卿等制。勅具官某等。朕惟皇太后功存宗社。與國無窮。奄棄東朝。遽終大事。所以致孝養者。不可得矣。推恩外氏。其敢後乎。爾等乃慈德之諸父。而中臺之高選也。率職以事上。檢身以齊家。攷于公言。咸有令問。式昭異數。用陟文階。或冠卿列於司農。或正郎位於司計。往其祗恪。茂對寵休。楊文公集除太常少卿分司制。大中祥符六年六月日。左司諫知制誥路振行。仍

降中書劄子。奉聖旨。且令在陽翟縣將治。候痊損日。發赴西京。勅。朕以

內署之職。任重地親。非賢才而莫居。於待遇而尤異。其有忽露章而引疾。不俟命而遽行。過群議之弗容。由朕心之獨斷。尚加寵命。特示優恩。翰林學士。正奉大夫。行尚書戶部郎中。知制誥同修國史。判史館。上柱國。南陽郡開國侯。食邑一千六百戶。賜紫金魚袋。楊某。早以清才。入居丹禁。雍容可尚。博雅有聞。名實相符。久叅侍從之列。文采足用。克施演潤之功。頗彰勤瘁之心。遽罹寒暑之疾。惟爾母氏。列狀具陳。願解職於深嚴。冀燕居而頤養。達予聞聽。良用惻然。宜推從欲之仁。式表優賢之命。貳卿樂寺。分務西都。勉就便安。無忘欽服。可特授守太常少卿。分司西京。散官勳封。賜如故。仍放朝謝。蘇東坡大全集杜訢鍾離景伯除少卿監制。勅。朝議大夫

少府少監杜訢。中散大夫鍾離景伯。朕登進耆老。崇德以靖民。敷求雋良。養材以待用。非更練有素。不輕用其人。以爾訢久服官箴。善守家法。景伯既敏而藝。有聞于時。皆吾四世之良。往服九卿之貳。益固汝守。將觀厥成。並可依前官。訢守衛尉少卿。景伯行少府少監。夏文莊公集右諫議大夫。叅知政事。魯宗道可給事中。餘如故制。勅朕紹隆景業。大庇中區。實賴股肱之臣。燮和天地之道。務在尊寵。式表眷懷。具官某。神稟嶽靈。氣載弦直。文章雅正。道藝深明。方重敢言。忠厚無間。簡自先聖。輔予冲人。不吐剛而茹柔。常疾非而甄善。倡率群后。翊贊正司。洽茲重熙。莫匪嘉績。宜升勞於瑣闥。示嘉寵於黃扉。更賴畫規。奉若時命。可。左諫議大夫充集賢院學士孫僅。可給事中。餘如故制。勅國家覃慶汾睢。逮茲六稔。庶官考績。咸叙其勞。眷乃侍臣。宜加寵異。具官某。環行明識。成於夙齡。麗藻清規。冠我時彥。而自諫垣。引籍僊殿。兼榮于彼。藩宣奏課。而連最審。茲邦憲處。法以甚平。績用居多。歲月滋久。俾擢居於瑣闥。用特聳於朝榮。往踐厥官。更圖來効。可。樞密直學士右諫議大夫任中正。可給事中。餘依舊制。勅汾睢均慶。積有歲時。考課最於官司。已陟明於群吏。眷繁劇於京府。宜䟽寵於侍臣。具官某。學識該通。器致宏遠。積純粹之性。懷幹裕之材。而自入

直樞廷兼榮諫省。藩宣巨屏。惠撫於黎蒸。尹正中畿。肅清於豪右。惟積勞之滋久。宜信賞之有加。特進秩於瑣闥。俾增崇於密侍。荷茲寵異。無怠乃誠。可。宋元憲公集翰林學士尚書。刑部郎中。知制誥。丁度。翰林學士尚書。刑部郎中。知制誥。晁宗慤。並可尚書右司郎中。依前充職。翰林侍讀學士。諫議大夫梅詢。可給事中。依前充職。制。勅。中臺綱轄。望冠郎闈。左曹駁正。地榮瑣闥。非我才哲。疇參盛選。以爾具官。丁度。懿文敏行。謙而有守。具官晁宗慤。英辭素節。介實能通。具官梅詢。吉履清規。久而彌劭。並頡頏賢路。光華王國。或玉堂視草。宣潤色之勤。或露門陪學。副諮諏之益。分莅朝局。咸克歲勞。寵秩應星。崇聯拜夕。宜因近侍之最。交允序遷之舉。率仍祕職。尚重禁林。可。胡文恭公集。富弼可資政殿大學士。依前給事中。制。勅。朕設別殿之職。寵名儒之賢。資其學優。居乃詢於道術。倚其名重。出則殿於翰垣。惟吾體貌之臣。適寄股肱之郡。宜疇切次。益峻儀刑。以爾具官某。履正蹈方。秉文經哲。才周通於治體。識迎照於幾先。鄉復賢科。首躋德舉。籍甚朝廷之望。居然廊廟之姿。直質弗流。謹言罔伏。殊疆出對。挾無所憚之心。大節極臨。有不可奪之色。高其忠力。嘉乃謀謨。擢亞內樞。屢籌前筋。愍勞久職。歷寄二藩。睠言表海之邦。號曰東秦之重。教條班錄。恩信施行。

流庸自歸。苛慝不作。厥勞甚茂。乃勝方深。忽覽來章。姑求便郡。深惟舒緩之俗。方資控帶之才。况德刑已孚。難驟移於守相。而士風可樂。足奉侍於慈親。擲進貳於禮卿。復條陳於讓牘。雖高已節。終鬱朕心。是用褒進大名。申昭異數。斯協至公之典。以將東顧之懷。少煩撫臨。益在綏靖。惟當懋勉。以亮倚毗。唐白居易長慶集。義武軍行營兵馬使高從政等五人。河東節度行營兵馬使傅義等二十四人。並破賊。可御史大夫中丞侍御史制。

勅。古者賞不逾時。所以勸勲庸也。爵有加等。所以激忠勇也。而某官高從政等。以義武之師。統晉陽之甲。前蹈白刃。中推赤心。大摧賊徒。連告戎捷。超榮速賞。爾實當之。故視軍功。遞遷憲秩。破竹之勢。其思有終。可依前件。崔瑄可職方郎中侍御史知雜制。勅。近歲已來。副相多缺。朝綱國紀。

專委中憲。而侍御史一人。得總臺事。以左右之。今御史中丞德裕。以中散大夫。行尚書吏部員外郎。上柱國。崔瑄。守文無害。莅事惟精。在郎署中。推有才理。奏補是職。請觀其能。因而可之。仍加寵秩。操執舉措。爾無自輕。可行尚書職方郎中。兼侍御史知雜。散官勲如故。太常博士王申伯。可侍御史鹽鐵推官。監察御史裏行高諧。河東節度叅謀。兼監察御史崔植。並可監察御史。三人同制。勅。某官王申伯。學優行茂。飾以詞藻。執禮定議。

多得其中。某官高諧溫莊潔白。不交勢利。某官崔植外和內直。通知政典。在倫輩內。而人皆謂之滯淹。唯是二三子之才。吾得於御史中丞僧孺。御史吾耳目官也。非清明勁正。不泥不撓者。安可使辨淑慝。振紀律。廣吾之聰明焉。並命同升。無忝是舉。可依前件。盧昂可監察御史裏行。知轉運永豐院制。勅。虢州司戶參軍盧昂。前負瑕疵。事多曖昧。今聞修省。善亦昭彰。况有大僚。同知情狀。且明非罪。仍舉有才。吾信人言。遂可其奏。爾思自効。無辱所知。可依前件。除拾遺監察等制。渭南縣尉庾敬休等。咸文行清茂。士之秀者。宜從吏列。擢在朝行。各隨才用。分命以職。司諫執憲。佇有可稱。杜牧樊川集。皇甫鉉除右司員外郎。鄭深除侍御史內供奉等制。勅。夫聖人之理。百代同道。無他術也。綱紀盡舉。而關轄不寬。故提綱主轄之司。為邦立理之本。言於其屬。豈敢輕取。浙西道都團練副使朝議郎檢校尚書刑部員外郎兼侍御史。賜緋魚袋皇甫鉉。鄉里秀人。臺閣名士。能以文學發為官業。朝議大夫前守河南縣令。上柱國鄭深。生於清族。克肖素風。凡守郡邑。皆著理行。會府叢委之任。憲司抨彈之職。委之授汝。得不戒之。夫為政也。日夜思之。勤而行之。此乃子產之言也。剛亦不吐。柔亦不茹。此乃詩人之所稱也。四海百司之條目。舉之在勤。破制壞法之

奸蠹糾之在敢。率是二者。可曰當官。各服寵榮。無忝遷擢。鉉可尚書右司
員外郎。散官賜如故。深可侍御史內供奉。散官封勳如故。韋退之除戶
部員外郎。裴德融除殿中侍御史。盧頴除監察御史等制。勅仲尼見負
版者。則必式之。此言爲國根本。不敢不敬。况其官屬。豈可輕用。漢家授御
史。多於立秋。蓋以風霜始嚴。鷹隼初擊。古人垂旨。可以知之。朝議郎行殿
中侍御史韋退之等。皆章甫高危。逢掖褒博。表裏文行。師法典常。退之嘗
歷憲臺。久居官次。性既安靜。事皆達練。德融典校延閣。服膺群書。美價廣
譽。旁溢遠暢。頴佐賢侯。名聲籍甚。留滯在外。而非所宜。地官爲郎。南臺持
斧。皆有職業。佇見風彩。各思率勵。以副甄昇。並可依前件。宋夏文莊公集
監察御史知陝州軍府事李階。可殿中侍御史。餘依舊制。勅某。分陝奧
區。介於司雍。控引川陸。蕃輔京師。共治之臣。甚難其選。苟得良牧。何吝寵
章。以爾文藝優深。識度宏遠。頻繁事任。淹歷歲時。潔已臨人。在公正色。滑
鄭之治。民甚便之。宜進榮資。俾臨劇郡。必有嘉効。以稱朕知。可。王魏公集
太子中允充館閣校勘范鏜。可依前太子中允館閣校勘。充監察御史裏
行制。勅具官某。御史府網紀糾正之地。舊制職務從簡。官不必備。今朝
廷方講明憲令。增置佐屬。所以飭庶政而廣言路也。爾文章吏事。有聞於

時往副選掄。勉祇厥職。可。王安石臨川集龍圖閣直學士李東之。刑部侍郎。充集賢院學士。判西京留守。司御史臺制。勅。古之仕者。難進易退。陵夷至於後世。而禮義廉恥。幾乎息。恬於勢利者鮮矣。而苟得躁進者。不乏於朝。教之未孚。朕深患之。顧吾左右親近之臣。行義合於古之仕者。宜從其志。使在位之貪者有愧。而慕焉。其官某。名臣之子。能自修。敕出。備蕃維之任。入爲侍從之官。而乃力辭顯榮。退就閑職。別都執憲。地清務簡。持峻秋官之秩。仍通麗正之班。吾惟爾嘉。其往居息。可。宋元憲公集尚書禮部侍郎。參知政事。石中立。除尚書戶部侍郎。資政殿學士制。敕。登賢于朝。所以贊機務。均逸于位。所以優老成。矧左戶亞卿之聯。西清別殿之職。合是寵數。且解近司。以爾具官。石中立。文雅兼資。夷素無競。早階朝弁。遂服材林。自書命於掖曹。旋升華於禁從。藹然休問。溢于公朝。鄉藉珪璋之姿。入參槐鼎之重。左右大政。勤勞厥躬。年序甫周。道冲彌勝。宜適終謙之槩。憫嬰賦政之煩。特進寵名。仍光祕秩。往膺兼授。尚對徽恩。可。李沆集除趙普門下侍郎。同中書門下平章事。集賢殿大學士制。閔散同功。歸馬遂隆於周道。蕭張叶力。斷蛇因肇於漢基。必資佐命之臣。以輔興王之業。推忠協謀。佐理功臣。樞密使光祿大夫。檢校太保。兼御史大夫。上柱國。天水

縣開國伯趙普。功參締造。業茂經綸。稟象緯之淳精。契風雲之良會。洎贊
樞機之務。屢陳帷幄之謀。沃心方佇於嘉猷。調鼎宜膺於大用。俾踐台衡
之位。仍兼書殿之榮。爾其罄乃一心。熙予庶績。君臣相正。勿忘獻納之規。
夙夜在公。勉致隆平之化。往服休命。無愧前修。鄭起潛立。庵集通奉大夫。
華文閣待制淮南東路制置安撫使兼知揚州李曾伯。除寶章閣直學士
制。淮海揚州久藉東土。爾侯之重。圖書秘府。肆陞西清學士之華。錫以
絲綸。光于牙纛。具官其中。和而篤實。謹厚而閎深。密庸堂上之兵。富有胃
中之甲。智慮沉潛於言表。筭有成謀。事幾迎解於目前。神無滯用。入則彌
綸於省闈。出則總護於戎旃。以十連之帥。鎮星紀之區。如七尺之軀。護風
寒之處。北門之管鑰。汝寄西州之唇齒。汝兼城池高深。事事皆有其備。卒
乘輯睦。人人咸得其心。以守則持重而養威。以戰則奮厲而倡勇。寬予憂
顧。嘉汝勤勞。爾雖執辭。賞之謙。朕欲示勸功之信。庶幾夙夜。以永終譽。尚
垂竹帛之功名。一乃心力。其克有勲。迄保江淮之清晏。祇承茂渥。益厲壯猷。
馬碧梧玩芳集朝請大夫。試兵部侍郎。兩淮制置使兼知揚州李庭芝。除
寶章閣直學士。依舊制。元帥崇詩書。久榦方而佐辟。學士備顧問。爰進
律以褒功。迪惟英儒。允稱茂渥。具官某。經綸學富。綏御謀長。材能空冀北。

之良人物挺漢東之秀正封從軍之句蚤欲驅海若而逐天狼德裕籌邊之圖可以扼吐蕃而控南詔五年制閩兩道撫師齊人章章而歸魯疆申伯亶亶而維周翰率彼淮浦賢於長城春爾條桑秋爾滌場坐喜邊民之復業文能附衆武能威敵疇非帥閩之成勞伊功伐之可稱屬倚毗之方厚登華邃閣增重禁塗仍資固圉之謀嗣奮折衝之畧噫寧人有指疆土永言寶宇之儲賢者能立邦家在固金甌之業式寬憂顧益懋綏懷可

權禮部尚書兼直學士院兼給事中兼同修國史兼侍讀牟子才持授試禮端明殿學士知建康府兼福建運使江萬里除資政殿學士依舊任制

漢褒循吏下郡國之璽書唐寵藩臣賜便殿之衣物矧我阜陵之潛邸付之樞筦之舊儒亮采有邦治理著唯良之效式序在位寵名高特置之班具官某學自立軻道陳堯舜文章行世則江河萬古之流論諫憂時則仁義百篇之奏積繇人望擢在政塗同寅協恭夙已間兩社而輔公室宣德流化又煩倡九牧以阜兆民間之輿樞建爲盛府大僚貴倨汝則平易近民浮俗夸奢汝則清修苦節治有異等人無間言旣奏最於雄藩合升華於秘殿事權增重恩數又新噫朕皆知之無日建州之云遠民之望也姑爲穎川而借留益懋蕃宣嗣膺簡注可張紫微先生集梁揚祖爲措置

擒捕虔吉州盜賊。今已盡靜。除顯謨閣學士制。勅潢池詰盜。旣收方面之功。循吏著稱。宜用增秩之典。載之盟府。行以贊書。具官某。蔭藉高華。材資畢給。初從行於天下。居多負緘之勞。逮法從於甘泉。益振侍臣之譽。深通明於吏理。克紹績於家聲。矐此江西。久離寇擾。吏唯憂於坐課。但肆謾言。賊率用於文降。未嘗自出。爰資敏政。輔以兵威。取彼凶渠。破其姦橐。里閭安堵。枹鼓稀鳴。曾無旬歲之間。盡去積年之害。載嘉獻狀。宜賁恩章。升華學士之班。增重价藩之寄。令行禁止。旣嚴連帥之威。稜俗易風移。尚慕古人之條教。益殫夙夜以惠黎蒸。可。范石湖大全集起復新知廬州葉衡可敷閣待制樞密都承旨制。奪情之典。實自從戎。基命之司。正關立武。旣可緣於古誼。宜更錫於詔除。具官某。才猷應於時須。風績愜於僉論。出分藩郡。卓有能聲。入領計曹。敏無闕事。慨閱時之在疚。申變禮以遄歸。弗與其辭。婁招乃至。朕念北陸作牧。固惟金革之虞。而右府爲僚。亦總甲兵之問。爰進寶儲之直。俾須密命之承。揆理弗殊。留行惟允。儻忘家而憂國。當移孝以爲忠。江南東路轉運副使沈度。可祕閣修撰。寧國府長史制。朕惟前代時若。遠遣親王爲國藩翰。又稽天聖令甲。立之參佐。以統理庶僚。紀綱衆務。職有常古。非敢私于我家。疇咨時才。往踐厥次。以爾聞見。

有原儒雅飾吏公府卿寺駸駸近密而轍環江閩泊然難進故以論譔清
班俾輔吾子昔之遴選此官者號稱天下第一惟清介正立者宜焉爾尚
無愧其克欽承劉後村續集陳綺除右文殿修撰樞密都承旨制古太
尉掾均爲公府之僚今承旨廳實長樞廷之屬粵自改元豐之新制類多
處法從之名臣具官某智畧輻湊於上前麾節轍環於天下心平氣定居
然龍見而雷聲事至物來甚於龜卜而燭照治賦鄙牙籌之瑣屑聽訟察
銘箒之隱微久勞煩以米鹽簿書且周旋乎亭障堡戍朕方修車備器圖
回復古之功孰能借箸運籌裨贊本兵之地與聞機密稍亞論思強本可
以折衝直前可以論事噫在元祐則安世由風憲除在紹興則剛中以功
名顯益攄賢業追企前脩鄭起潛立庵集朝請郎守太常少卿兼樞密副都
承旨趙希堊除右文殿修撰樞密都承旨制一冗職機廷訂謨密勿侍朝
便殿導旨禁嚴自熙寧以三館兼行逮紹興則兩制充選茲爲重任允屬
清流爾才挺宗英學高儒望行已恭而事上敬知無不爲見善明而用心
剛介然有守久彌綸於省闈復陪輔於籌帷國論賴以主張邊筭資之裁
決廼正宥府欽承之職載陞道山論譔之名方四郊多壘之時出納朕命
凡五兵六師之事教寧圖功惟乃之休則予以懌洪平齋集趙立夫除祕

閣修撰樞密副都承旨制。勅具官某。天下之勢猶衡。朕旣遴東廷彥。出長外服。必博選民庸。入治內服。然後無輕重之偏。爾頃繇九列。觀風近甸。聲氣不搖。而百蠹戢。蓋吏師也。孝宣厲精政事。樞機周密。周貴加詳。密貴加謹。維爾老於識。而精於慮。式適其歸。以謨著中。祕參宥廷之導旨。周密以濟中。興其庶矣乎。可。宗正少卿張嗣古。除祕閣修撰。樞密院副都承旨制。勅具官某。朕長馭中原。樞掾皆得以與聞廟筭。矧導宣密命。日與柱下史並直文坳。爲最近。爾識照未然之機。材擅有用之器。曩記言于朝。國勢虜情。論建甚悉。恨不果用也。白首重來。識益定。材益老。其以中祕論謨。參承宥密。制勝之略。保大之謀。凡可以贊吾樞紐者。毋懲母忽。可。虞儔尊白堂集同知程松父。九萬特除集英殿修撰制。朕惟明有國。善善之風。謹古訓。親親之義。得人而用。灼知移孝之因。推本而言。益見教忠之效。茲有成命。形于贊書。某官父某。蘊當今平治之才。負邁往不羣之器。頡頏仕路。先豪俊以著鞭。際遇清朝。視功名猶唾手。分符典州。則最課輒上。杖鉞分閫。則威名遠聞。聿觀賢嗣之飛騰。力以親嫌。而引避。九華勝踐。暫韜斂於風雲。萬里宏程。自優游於歲月。琳宮均逸。錦里推尊。眷家學之有傳。簡朕心而大用。是爲有子。方正位於樞廷。豈不懷卿。爰陞華於祕殿。宣爲

異數孰謂彛章。念本朝曾不數人。良深嘉歎。在一門實云盛事。宜有光華。其亟欽承。以永終譽。胡文恭公集宋祁可依前右諫議大夫。充史館修撰制。勅具官某。國之大典。莫尚於策書。世有史官。實顯於筆削。思立言於不朽。用垂法於將來。曹屬耆英。廼尸述作。以爾學通今古。文擅宗師。職可貫於動微。才足經於治本。鄉代言於掖省。復定草於禁林。盤詰之風。炳於三代。訓辭之體。厚厥二京。歷近輔以政成。睠邇英之籍舊。疇咨勸講。召復近嚴。屬撰次之缺。負冀選掄之任。職絕踰雋。碩參寄編摩。制度文章。用煥一時之美。才流職業。更增二惠之華。有若世官。實惟家學。尚倚敷經之善。勿忘書法之良。孫抃可依前禮部郎中。知制誥。充史館修撰。判館事制。勅史官尚矣。歷代有之。述春秋五例之餘。顯邦國四方之掌。必也書法。使善惡昭於前。其次立言。用文采表於後。惟是撰著之美。則宜後碩之流。具官某。篤行直躬。高文強學。達夷吾治體之要。有壺遂君子之風。曩從西臺。服在禁署。視淮南報賜之草。作伯禽封拜之書。行於諸侯。豈惟謨訓之厚。置諸太史。亦繫識業之長。加復同官之僚。率取一時之望。對執南董之簡。遲煥唐虞之文。緝熙予猷。往踐乃職。周琮李用晦。可並司天中官。正于淵舒易簡。可並司天監丞。王士隆。可守少府監主簿。充翰林待詔制。

勅某言天之學古有三家粵若渾儀。昭合乾體。朕緬懷往範。恐失舊傳。因命究研。且令制作。適觀成績。第用賞勞。爾等通石田之經。深梓慎之術。能奉吾詔。咸竭乃精。克正規模。弗愆畧度。差進清臺之秩。并豫禁林之聯。往服朝恩。無替爾職。張紫微先生集。陳桶韓世忠奏。爲與金牌郎君迎敵。自淮陽城下。差委去湖陵千秋。同共措置。逐次獲捷。欲乞除落。過其元帶。貼職詳察。施行奉旨。右朝請大夫參謀官。依舊右文殿修撰制。勅懔威于境。固資閫外之良。揆策于軍。亦賴幙中之彥。爾頃詒吏議。名在刑書。荐歷歲時。旣從昭雪。逮此偏師之出。具宣贊畫之勞。宜還論譔之華。以示褒優之渥。尚殫夙夜。益茂遠圖。可。唐杜牧樊川集。張幼彰程修己除諸衛將軍翰林待詔等制。勅翰林待詔昭武校尉前守左驍衛將軍上柱國賜紫金魚袋張幼彰等。幼彰修己鴻都奏伎。巧於丹青。用志不分。與古爭品。審以武進。晚能知書。屢以辭章。上干丞相。知實以謹良。綰務師儒。以詳練守職。或藝或勞。或遷或拔。將軍佐寮。皆爲寵擢。各守職秩。無忘專慎。可依前件。揚知退除鄆州判官。薛延望除美原尉。直弘文館等制。勅將士郎前守京兆府藍田縣主簿。揚知退等。國家盪定齊魯。餘三十年。多用名儒鎮之。以還古俗。其諸賓吏。皆爲秀彥。弘文館四部群書。十八學士。詳考理

亂鋪陳王道。此乃貞觀之故事也。若非名士。固不與焉。知退文行溫雅。副幕府之求。廷望才學聲華。膺丞相之選。當戰伐之後。切於供饋。庠績自以清幹稱於有司。予非能知。咸徇其請。各宜率勵。無累所舉。可依前件。宋夏文莊公集翰林院藝學殿中丞同正蔡齊古。可依前殿中丞同正充翰林院待詔制。勅漢金馬有待詔之臣。備清問侍從之職。唐禁林有執藝之士。陳太古雅正之聲。朝廷因之。並建其選。以爾具官某。早工絕技。克暢治音。宜書歲月之勞。式獎均調之業。往階顯秩。無忝隆恩。可。王珪華陽集國子監直講胡瑗可太子中允天章閣侍講制。勅前代稱治之世。舍文章禮樂之作。則何觀焉。朕方游精太平。思與儒賢以講劇道。藝于禁中。維爾少而學古。白首不懈。其行義純正。言論淵博。蓋嘗攬于近臣之章。茲命爾通朝閨侍。經幄其稽聖人之言。切于當世治亂之監者。日極陳之。夫遠弃諛邪。親禮端艾。朕靡有意虐。可。彭汝礪鄱陽集鄭穆揚王府翊善直集賢院盛僑揚王府侍講制。勅某等維朕叔父。為時賢王。令德孝恭。好善不倦。朕東厥屬。尤難其人。以爾穆白首一節。久而彌彰。以爾僑秉心無邪。見於已試。並祇厥服用。介厥成可。葉均試祕書監直龍圖閣制。勅夫鳩聚圖藉。用考古今。養育人材。以待任使。俾長厥事。其人為難。具官某莊重而有

文淳壹而不撓。爲改太府之命。使登大蓬之榮。勉倡厥僚。以副朕意。可洪文安公小隱集右承奉郎田公輔轉兩官。除直祕閣。賜紫章服制。汝父董上流之寄。今二十年矣。爲國長城。朕欲見而未能也。故趣覲其子。致朕意焉。疊進文階。寓榮中秘。金章紫綬。併華爾身。式迨其歸。無怠忠孝。左中奉大夫直敷文閣知臨安府張偁除直顯謨閣制。國家爵賞之柄。輕重。眡功。功之所在。雖微必錄。蓋以示勸也。爾尹正天府。以材諳聞。都城庀工。時爾董護。役不愆素。奐馬一新。有司議勞。實在最等。西清邃直。躡級而升。朕之所以寵爾者至矣。其思勉懋。以稱所蒙。周益公大全集一省樞密院。奏武鉅昨收復鄧州。其知房州司馬倬。首遣鄉兵二千人。應副錢糧。共濟國事。閏二月十七日。聖旨特除直祕閣制。勅具官某。南陽版藉。歸我職方。莫府上功。朕旣以差而賞之矣。惟汝填臨。凋郡。協比鄰邦。悉其賦輿。助闢境土。寓直圖書之府。豈獨爲汝勸哉。表而出之。所以使搢紳介冑。問知吾文正公之有後也。直祕閣知盱眙軍龔塗職事脩舉。可除直徽猷閣制。勅具官某。國家間暇。守邊城者。雖微扞禦之勞。然久於其官。使斯民按堵。撫字無曠。是亦能矣。升華內閣。寵以璽書。毋替厥勤。益觀來效。可。隨龍從義郎趙行依孫璫。例除閣門祗候制。勅具官某。祖宗之世。凡

隸名上閣者。皆書之冊。其重如此。近世用人衆矣。朕欲稍遴其選。而爾繇攀附得之。非幸耶。尚思共恪廉平。以稱恩渥。毋使人謂朕爲私汝。可。劉後村續集承奉郎賈德潤除直祕閣制。古之王者。幼吾幼以及人之幼。况於宰相子乎。爾生而穎異。雖未勝衣冠。而趨拜朕前。有成人之風。擢之延閣。示嘉獎竒童之意。此日之拱把。他日之聳壑昂霄者也。益勤于學。以對寵光。可。知漳州洪天錫除直寶謨閣依舊任制。昔汲黯在廷。以嚴見憚。及出爲右內史。則職事不廢。守二郡。則閉閣卧治。而政清。視嚴助吾立壽王。數年不上計。至勤璽書督責者異矣。爾由前御史牧清漳。其未至也。皆有薄淮陽之疑。其既至也。躬細務而不流於清談。舉大綱而不事於小察。士曰。吾得嚴師矣。民曰。吾得慈母矣。朕以爲有黯之風。奎閣寓直。雌堂借留。用漢故事。以爲郡國二千石之勸。可。高著齋薇垣類藁朝請大夫知興化軍張友直祕閣依舊制。觀近臣以所爲主。觀遠臣以其所主。持是以爲審官之鑑。人馬廋哉。爾天資䟽明。官業詳整。以介潔而臨財。故有餘積。以撫字而臨民。故有留愛。越我一二邦。以修爲海濱大老。亟稱而明揚之。肆觀所主。進直蓬丘。仍汔民庸。嗣膺顯陟。可。慕容彥逢。擢文堂集朝請郎。同管構成都府等路茶事。兼提舉陝西等路買馬公事。龐寅孫。可依前

官除直祕閣。差遣依舊制。勅具官某。爾以材力之優。往按茶事。收息饒羨。勞列可嘉。芸閣寵名。選授惟慎。增華使指。爲爾之榮。徃其欽承。益圖効實。可。林光朝。艾軒集。知廬州。王希呂。除直寶文閣。再任制。具官某。西顧淮堧。莫尚總戎之重。壯連邊瑣。蓋取折衝之選。廼錫贊書。是爲申命。以爾受才明雋。積慮正平。百步生風。獨養諫臣之氣。一行繫日。要從史氏之公。眷雄閫而重臨。表長才之已試。並修耕築。用儻事功。肆加因任之華。莫厚寵名之賁。尚迪明訓。益振良圖。可。洪适。盤洲集。知盱眙軍。郭淑。直閣制。制。爵祿天下之砥石也。有勞必賞。能者斯勸。爾材智闓敏。遇事風生。一障之乘。弗憚險易。視探虎穴。如行坦途。列職道山。旌汝體國。張紫微先生集。宋萬年。爲金賊侵犯。糾集軍馬。竭力保捍。敦減過官。依舊給還。仍差權知慶陽軍府。兼主管經畧安撫司公事。節制鄜延環慶路軍馬。換給。仍陞除直顯謨閣制。朕惟狡虜入寇。自非智者獻謀。勇者出力。以逆折其鋒。曷能有濟哉。爾奮身儒學。擢任邊瑣。糾合義旅。爲國保民。大帥上功。三復嘉歎。陞華延閣。用勸忠勤。尚懋爾圖。以底成績。小使臣帶閣門。祇候制。朕惟陝服河外。淪陷積年。忠義之徒。未嘗忘漢。果俟可爲之會。皆立昭明之功。覽獻狀之沓來。顧疇庸之可後。俾進秩於武列。且卮職於九闈。益屬

爾圖嗣膺褒陟。牛寔爲措置捍禦賊馬。保守宿州。備見宣力。忠義可嘉。特除閣門祇候兼殿前司選鋒軍將官。依舊添差宿州兵馬鈐轄。統制本州管內諸山寨鄉義民兵制。勅符離。今最被邊密。通仇讎。爲朝夕釋憾之地。朕念其餘民。不忘日夜。爾能糾合義旅。全父兄之親。見忠勇之節。可無寵獎。以厲其餘。俾充職於九闈。兼將屯於七萃。益思奮發。嗣有褒陞。可翟忠惠先生集。汝州防禦使。知客省事。錢愕。除樞密都丞。旨中亮大夫趙希古。知客省事。左武郎朱孝莊。簽書東上閣門制。朕惟成周侍御之臣。粵虎賁小尹。暨于攜僕。罔不秉德。祇畏丞弼。厥辟夙夜。無敢戲怠。朕用昭德塞違。以厥庶尹。達御事。用追迹于文武。以爾具官某。將事歷年。罔有逸德。朕嘉乃庸。無斁乃事。其陟前列。往踐乃職。曰愕。爾承朕命。曰希古。爾典屬國。曰孝莊。其以爾莅上閣。咸聽朕命。無棄爾成。嗚呼。戒哉。弗慎厥初。其艱有終。汪藻。浮溪集。俞隨。劉公彥。知東上閣門事制。朕肇開四門。延納多士。思得戎班之俊。長吾賓贊之寮。具官某。秉德忠純。受材開敏。地處橫班之邃。秩升廉使之崇。其服端闈。統司謁者。肅等威於表著之位。傳臚句於陛簾之間。嗣有寵褒。無忘祗恪。夏文莊公集。東頭供奉官。閣門祇候王懷忠。可內殿崇班。依舊閣門祇候制。勅某。早列官常。荐經事任。歲時滋

久勞劾可嘉。特疏寵於近班。仍兼榮於上閤。勉思勤瘁。以答甄明。可。鈞
容直製。撰應奉文字。孫渥。可將仕郎。守衛州叅軍。依舊祇應制。勅。其環
衛之師。寔有武樂。汝早爲其屬。造彼優辭。頗積歲時。未預官牒。爰加散掾。
以賞厥勞。更務竭心。庸資獻曲。可。周益公大全集。昭化軍節度使。嗣濮王
士輅。女夫。司公度。除閤門祇候制。勅。其人。傳曰。厚於仁者。薄於義。厚於
義者。薄於仁。念我宗英。老而無子。間因賜對。爲壻求官。本之人情。寵以華
職。睦族固爲仁矣。合宜獨非義乎。厚薄之分。朕所不取。可。忠訓郎。武學
博士。張德明。除閤門祇候。與副都監。差遣制。勅。具官某。服采于朝。以觀
人之器識。護兵于外。以試人之事功。凡用群才。皆存深意。爾脩身閱古。多
譽無疵。右學索年。諸生所信。列之上閤。許以外遷。尚勉爾爲。朕方有試。可。
慕容彥達。摛文堂集。右班殿直。梁誼。可依前右班殿直。閤門祇候制。勅。
具官某。朕念爾父。被遇先朝。服勤邊陲。聲績兼茂。宜推恩典。寵錄其孤。聯
職閤門。選授攸慎。今以命爾。維以勸忠。徃務欽承。無替厥紹。可。劉行簡。茗
溪集。故嗣濮王仲湜。壻承節郎孟思恭。可閤門祇候。免供職制。勅。具官
某。上閤之職。號稱華要。選擇惟遴。不以假人。爾以王邸之親。獲膺是寵。其
思自飭。以稱所蒙。可。王東牟先生集。裴良琮。轉秉義郎。除閤門祇候制。

具官某。朕以東朝之戚屬。上閣之班聯。庸示眷恩。俾閑儀矩。往當祗肅。思副寵嘉。胡文恭公集。孟永寧可。新州新興縣主簿。充翰林待詔。御書院祇候制。勅某。恪奉嚴宸。頗精楷法。籍禁門而惟舊。成寶刻而有勞。特疏一命之榮。且獎六書之善。益專小學。往服茂恩。錢彥遠可。起居舍人。直集賢院知諫院制。勅具官某。夫納忠之先。莫若箴王闕。興治之美。無如任諫臣。援推渥茂之恩。用獎正方之士。質之公論。咸曰職修。以爾風議。周才謨兼劭。以富平之德器。出太伯之世家。紹休前人。協比介第。聯對大策。著聞本朝。敷奏其言。咸有補於世務。參試以政。復無害於吏文。嘉其行能。任以言責。議論慷慨。退公委蛇。獻納既勤。旌陟宜及。古史之任。參記言動。麗正之學。領校典文。舉用二職之華。進增七諍之重。爾其勿念後悔。無廢前勞。審思諸宜。勤補不逮。謹言切至。朕罔弗馬。李允可。起居舍人。同知諫院制。勅具官某。夫有言責者。思其忠。有官守者。修其職。保氏之任。則主進諫。右史之業。則司書法。均是二職。皆拾遺補過之臣也。自非忠正之士。疇勝左右之選。以爾莊修有素。方介不撓。比膺憲屬之選。進處臺端之嚴。糾肅朝聯。切劘治體。間陳得失。頗見納用。有嘉已試之効。且疇久次之勞。寵以記言。委之諫職。爾其往服休命。數進苦言。深圖薦替之勤。勿爲拱

默之計。周爰補察。以竚來忠。王珪華陽集。招箭班殿侍。訾彥澤。在班及十五年。補承節郎。仍舊存留在班。祇應制。勅具官某。方罷遣衛士。而次第官使之。爾以藝成。令祇舊次。宜益矜奮。以須後恩。可。沈氏三先生集。度支員外郎。直祕閣。同脩起居注。司馬光。可起居舍人。同知諫院。餘如故制。勅某。朕奉祖宗之成業。以臨天下。夙興夜寐。而欲寡其過。未能也。故博延亮直之臣。使得裨補。警言戒其不迨。庶幾有益。故察于群臣。而得爾光。惟爾光。學有原本。行有師法。方而能通。直而不撓。可謂卓然特達者矣。其正秩右史。參職諫省。往服乃位。盡規毋隱。務稱朕所以舉爾之意。可。唐白居易。長慶集。辛丘度。可工部員外郎。李石。可左補闕。李仍叔。可右補闕。三人同制。勅朝散大夫。右補闕內供奉。飛騎尉。辛丘度等。朕詔丞相。求方略。忠讜之士。置于左右。而播等以石暨仍叔。應詔言其爲人厚實。蹇直。嘗以文行謀畫。容於幕府之間。臨事敢言。當官能守。可使束帶。同升諸朝。又言丘度介潔。靜專。不交勢利。宜加推獎。以勸其徒。况久次者。轉遷。後來者。登進。皆適所用。平章可之。可依前件。宋徐鉉。騎省集。侍御史。王仲連。可起居舍人。監察米崇楷。可右補闕制。勅朕嘗思古先哲王。所以致理區中。垂憲萬祀者。蓋有史臣以記其過。有諫官以弼其違。或面諍于庭。或舉書于冊。

故政令所及。罔不化成。而怠惰之心。无自入矣。將振斯典。必求其人。某官王仲連。愛籍才能。亟叅秩序。正己而率下。盡節而向公。某官米崇楷。早負時名。尋升閤籍。佩韋以臨事。慎獨以修身。而並服豸冠。或司網憲。或立朝多按劾之奏。或典刑有欽恤之心。叶我懋章。宜升右掖。勉修官業。以副簡求。直筆正言。无有所諱。可。周益公大全集入內內侍省。寄資拱衛大夫。送郡承宣使李寀。與歸吏部。特差幹辦內藏庫。填見闕制。勅。祇事宮闈。既殫勤力。易官銓部。厥有故常。具官某。兢畏以自修。溫純而寡過。階視橫班之峻。職參留務之崇。藉爾幹材。司吾禁帑。尚體儉勤之意。毋忘出納之公。可。劉敦義。除武學博士。填見闕。樊仁遠。除武學學諭。填復置闕制。勅。其人。春學秋射。以考遊倅之藝。列於夏官。周制也。右學蓋其遺意歟。爾敦義。得師友之淵原。爾仁遠。慕功名而慷慨。進繇科選。寵以同升。古者命將在公卿。後世拔士於行伍。用非所養。議者病之。爾其即藝業以求奇士。使不待投筆而有自見者可。韓維南陽集河北轉運使太常少卿沈立。可依前太常少卿。充集賢修撰。知滄州。填見闕制。勅。提兵要制。邊劇者。必有加職之授。所以示寵而重威也。式圖俊良。奚吝褻渥。具官某。敏於聞見。雅自約修。內足群書。多明於義理。久更衆職。並著於事功。宜輟將漕之籌。進

司論撰之筆。宣我條詔。爲國翰垣。噫。惟寬惠可以得民和。惟嚴莊可以正師律。毋易乃事。則罔所愆。可。禮賓副使知忻州。靳宗臣。可。崇儀副使知麟州。填。李授。移起闕制。勅。某雲中據代地之要。以扼虜衝。兵符所寄。常慎其選。以爾雅抱武畧。久宣忠力。綏御民俗。條教不煩。訓齊軍戎。紀律甚設。故超授使領。往臨所部。毋誅利以生患。毋徂安而納侮。惟靜而勝。時乃之功。可。唐杜牧。樊川集。蕭孜。除著作佐郎。裴祐之。陝府巡官。崔滔。櫟湯縣封集賢校理等制。勅。在春秋時。晉爲諸侯國也。尚立公族大夫。教育諸卿之子。富有賢哲。不假搜聘。召同列而會者。三百餘年。况今天覆盡得。而禹畫無遺。名卿賢相之家。清風素範之族。子孫森羅。髦俊並作。次第叙進。豈嘆乏才。旣使判官。將士郎。守國子監。大學博士。蕭孜等。或以秀異得舉。文學決科。或以行實立身。遭逢知己。皆後生可畏之士。爲當時有才之人。東觀著述。殿閣典校。參畫幕府。開導獻納。清秩美職。二者兼之。不由階級。安至堂奧。勉於脩慎。以俟超升。可依前件。姚克柔。除鳳州刺史。韋承鼎。除櫟湯縣令。王仲連。贊善大夫等制。勅。中散大夫。前使持節。利州諸軍事。守利州刺史。上柱國。姚克柔等。仲尼曰。人道之大。莫先爲政之功者。其長人乎。克柔。嘗典一邦。愈知爲理。承鼎。增寅等。開敏有材。幹能堪事。河池

名郡畿內小侯仕於清時。皆爲良遇。大凡爲理之要先事孤弱。譬諸草木。無倦栽培。仲連荏苒官遇。歲月滋久。東朝贊導。亦曰升遷。各慎厥官。無忝榮命。可依前件。宋王珪華陽集祕書郎馮京。可直集賢院著作郎。沈遘可集賢校理制。勅某等。國家闢冊書之府。固嘗寵延天下豪英之士。以典校庠其中。所以廣儒術而養國器也。以爾京志識高邁。文粹於時。以爾遘業履純茂。才裕諸用。朕頃廷較多士。爾等藻詞逸贍。咸在異等之選。今試劇呂還命。給扎于禁林。而奏篇益麗。茲並擢丞太常。與游書殿。其日思勉。楸以稱予獎育之意。可蘇魏公集祠部郎中充集賢校理丁諷。可金部郎中。依前集賢校理散官如故制。勅尚書郎皆謂之清望。而左曹尤貴。今雖限年序擢。自非臺閣之選。不得預遷焉。以爾具官某地。胄高華。器質和厚。榮踐世職。稔服省闈。會課應條。進曹有典。自列諱終之禮。且援換秩之科。易以司金。皆聯左戶。往膺寵異之渥。益懋公忠之爲。可王安石臨川集同尚書門下平章事韓琦。奏親姪孫恬守祕校。同中書門下平章事曾公亮。親男孝純。將作監主簿姪孫謨。試祕校。樞密使張昇。奏親孫男戒守祕校。參知政事歐陽修。奏男辨。大常寺太祝。參知政事趙槩。奏孫男元緒。太常寺太祝。樞密副使吳奎。奏長男璟。守太常寺太祝。次男瓌。試祕校制。

勅某。朕受純嘏於神靈而布之在位。其官顯者。得任其子弟。以及孫曾。爾
 生大臣之家。是為賢者之類。往保祿秩。可無慎哉。可胡文恭公集樞密使
 王親姪孫廷年。給事中參知政事劉親孫男子雅。工部侍郎參知政事劉
 孫男燾。並可守秘校制。勅某男某。國家誕辰故事。推恩邇列。法得任於
 門子。禮特優於政弼。以爾年妙志美體。安節和本。諸惠訓之深。稔於宵雅
 之肄。宜有官薄。周寘京司。祇我恩章。勉于學力。李元方。可國子博士。范
 袞。郝大同。可並守殿中丞。呂惟和。崔象明。可殿中丞。黃延慶。可右贊善大
 夫制。勅某等。籍通王官。名任宰士。於規隨而尤曉。亦幹固之兼資。允屬
 三宮之文。追復九房之祀。推行制度。省闕繁文。亦繫敏用之明。不爽先庚
 之素。勤庸屢試。泛等宜優。入典經庠。進丞盾省。逮儲坊之僚屬。皆朝序之
 聯華。往服褒遷。益思恭慎。龔鼎臣。可秘書丞。張瑀。王鎡。可並大理評事。
 陳知常。可右贊善大夫制。勅具官某等。國家因堯典之舊。采周官之法。
 率用一閔。參比百工。著為成規。沉存大勸。爾等早階文藝之選。或資胄緒
 之華。服在縣章。恪居利局。書伐來上。舉最當遷。擢丞秘立。進陟儲案。胥及
 列卿之屬。對司理法之平。往荷茂恩。益圖敏政。陳藻。可秘書丞。梁谷。可
 左贊善大夫制。勅具官某等。夏口帶江。民俗喜訟。天水被塞。風謠尚武。

涖其屬邑。尤資健令。適有成治。爰賦茂恩。以爾或進。自丞髦。或任以承學。並華史局之選。咸佩縣同之章。齋伐自陳。按書當陟。丞清聯於本省。躋榮序於東朝。並無寵甄。益勵端操。周大象。可秘書丞。任利有。可殿中丞。陳之損。可贊善大夫制。勅國家制法以檢官。成計年而考吏治。勞能者進。否劣知勸。具官某等。或策名以文。或籍資而仕。並承風訓之益。咸聞節行之修。居邑者簡惠而不苛。領局者強敏而能力。以勞自白。在法宜遷。進承祕立。入豫盾省。逮升僚於東禁。並著籍於外朝。往哉欽承。務乃脩綜。宋元憲公集著作佐郎監洪州酒稅鄭修。可秘書丞。監澶州稅務于可度。可太子左贊善大夫制。勅具官鄭修等。籍佐京司。勤宣吏局。或權財官釀。或收筭門征。並循齋伐之規。來滿計年之格。宜疇善狀。擢寘外朝。書省即遷。儲坊序拜。姑仍續課。尚謹終更。可。大理寺丞監南劍州商稅張鑑。可殿中丞。簽書西京留守判官廳公事王珣瑜。可太子右贊善大夫制。勅具官張鑑等。或席蔭效官。或緣儒補吏。擢絲卿屬。參委事經。都幕借等。郡征書貨。率授考法。來諭歲成。殿監有僚。官坊著籍。宜乎賞典。並服朝聯。可。太子中舍劉德之。可殿中丞。大理寺丞溫嗣良。可太子右贊善大夫制。勅具官劉德之等。咸以吏勤。恪于官次。或縣章歷試。多列最凡。或訟牘見

誣。近蒙澄雪。並越歲成之目。宜借朝渙之恩。省省分聯。儲坊有籍。各祇榮序。尚服攸箴。可。夏文莊公集。祕書省著作佐郎。知蜀州晉原縣事。張錫。可。太子右贊善大夫。餘依舊制。勅。某等明經中選。敏學登科。竭節効官。在公凝績。攸司大校。賞典並行。是用進秩上臺。升華中御。或飛榮於鶴禁。或佐局於蘭臺。各勵乃誠。以答朝獎。可。祕書省著作佐郎。知蜀州永康縣兼兵馬監押任文素。可。太子右贊善大夫。餘如故制。勅。某等國家考課。績差善最。所以辨百工之能。求四方之政者也。以爾等早中朝選。恪居官次。勒宣幹力。脩奉彝章。歲月貿移。職用備舉。攸司大校。信賞並行。引籍外臺。振纓中御。洎春坊之書訪。皆仕路之美遷。更務夙宵。無忝恩獎。可。唐白居易。長慶集。李肇。可。中散大夫。郢州刺史。王鎰。朗州刺史。溫造。可。朝散大夫。三人同制。勅。朝請大夫使持節。澧州諸軍事。澧州刺史。上柱國。賜紫金魚袋。李肇等。乃者李景儉使酒獲戾。而肇等與之會合飲。失於檢慎。宜有所懲。由是左遷。分爲郡守。今首坐者既復班列。緣累者亦當徵還。但以長吏數易。其弊頗甚。况聞三郡。皆有政能。人方便安。不宜遷換。故吾以衆章階級。並命而就加之。蓋漢制進爵秩。降璽書。慰勞良二千石之旨也。爾當是命。得不勉哉。宋劉攽彭城集。朝議大夫。充集賢院校理。諸王府翊善。

王汾。可中散大夫。直祕閣。差遣依舊制。勅具官某。大夫以上。皆高爵也。至于中散。品秩益崇。祿餼益厚。吾所以待材庸之士。其能自致此者鮮焉。以汾敏學多閑。內行兢兢。繇歷詞館。久次王府。有以自守。事常裕如。考課當遷。俾從明陟。昔子雲叔夜。偕在此官。貼延閣通直之選。仍藩邸置醴之舊。祇服休寵。益思恪居。可。鄭獬。鄖溪集左司郎中知制誥張瓌。可左諫議大夫。依前職制。漢之諫大夫。常選通才蹇正之士。故其忠言鯁論。以開悟世主之聰明。後世鮮及焉。今以汝明於古學。高簡而有廉隅。久次掖垣。脩其詔令。數處駁議。抗而不撓。於歲當遷。乃進以爲諫大夫。代王者之訓言。兼爭臣之美秩。朕於帷幄之臣。可謂德懋於賞矣。可。夏文莊公集起復雲麾將軍解州刺史。充本州團練使。郭崇仁。可落起復授金紫光祿大夫。餘依舊制。勅某。彛鼎傳勳。詩書稟訓。早列通侯之貴。遽銜陟屺之哀。爰及外除。宜加茂寵。俾進階於三品。仍視秩於六官。益隆團結之榮。更勵夙宵之節。可。翟忠惠先生集徽猷閣待制。知興仁府錢郎。可通議大夫。奉行新法有勞制。善爲國者。因民所欲而利導之。使神人百物。皆得其極。朕爲資幣。以權重輕。民旣裕矣。亦惟爾吏推原德意。克底成績。具官某。能以豈弟。不忽鰥寡。奉承法令。敷迪有衆。夫爾旣推朕之良法。能顯信于下。而

朕可無必行之賞。以取信於爾乎。宋元憲公集江南西路提點刑獄。尚書都官負外郎。晁宗簡。可尚書司封。負外郎。尚書屯田。負外郎。通判鳳翔府。崔嶧。可尚書都官。負外郎。太子中舍。監兗州酒務。王整。大理寺丞。知南雄州。陳鑄。並可殿中丞。大理寺丞。知福州長溪縣。鄭戡。可太子中舍制。敕。其官晁宗簡等。並稱吉士。參服具僚。或使轂糾循。近承朝委。或州符倅守。交輯政經。或卿屬佩縣章。或官官掌酤利。雜馬會課。咸克應條。郎省分曹。殿廬贊府。逮于儲案。莫匪朝榮。即寵爾勞。用信吾賞。可。尚書比部。負外郎。知房州。徐弁。可尚書駕部。負外郎。尚書屯田。負外郎。通判楚州。沈周。可尚書都官。負外郎。國子博士。陳宗績。可尚書虞部。負外郎。殿中丞。監台州商稅。趙德亮。可國子博士。大理寺丞。知州。滴河縣。張利。可太子中舍制。勅。其官徐弁等。夫序官之方。責實爲効。功賞所值。寄於平衡。茲乃一邇。而均勸沮也。爾等並緣仕牒。參服王畿。或郡縣布條。或閨臺引籍。或貳藩。有最。或征旅載勤。咸以歲成。列在恩格。星闈郎選。米廩胄師。逮于儲坊。亦寵朝紱。差次而授。各竭乃衷。可。大理寺丞。知威州。趙祐。可殿中丞。知雲安軍。李敏。可太子中舍制。勅。其官趙祐等。各服吏資。參補卿屬。鄉分遐徼之守。通嗣前勞之庸。計最上聞。恩典無廢。陪官盾省。引籍震坊。有著

于朝。且寵其任。尚結終課。思稱序遷。可。殿中丞監在京豐濟粳米倉李宗傑。可國子博士。大理寺丞尚正德。可太子中舍制。勅具官李宗傑等。或經生服官。或蔭格延賞。智効茲久。歲成屢更。而參掌倉儲之煩。外司酒利之筦。通質前課。抑惟舊章。國胄清階。震坊華籍。宜從並命。且寵稍遷。可。大理寺丞。知河南府登封縣李虞卿。可太子右贊善大夫。監河陽清酒務聶德一。可太子中舍制。勅具官李虞卿等。並飭吏資。旅參卿屬。或邑折敏政。或官釀庀司。齋伐于朝。甄勞滿歲。訖無殿狀。胥協寵階。宜對踐於儲坊。且通榮於閨籍。益虔官守。尚對恩褒。可。太子中舍劉世寧。可殿中丞。大理寺丞劉文正。可太子中舍制。勅具官劉世寧等。醇謹服官。綢繆累課。或序華儲禁。或列案刑卿。率職殊聯。稽勞比牒。宜錄歲成之效。牙遷朝著之榮。可。夏文莊公集大理寺丞李象之。可太子中舍等詞制。勅具等。經術該通。吏能幹敏。振纓理寺。陟狀甚明。結綬賓筵。薦章交上。或陞華於鶴禁。或佐職於棘卿。各示甄明。勉思自効。可。大理寺丞。充三門發運判官錢智周。可太子中舍。餘依舊制。勅具等。國家以功詔祿。以能奠食。申明善最之格。旌辨勤勞之臣。所以勸天下。以至公也。爾等。各負吏能。屢分朝命。竭心從政。潔己在公。美課有聞。賞典斯在。宜進銅扉之職。或叅棘

路之榮。更務聿脩。以永終譽。可。大理寺丞。知絳州翼城縣姜矜等。可。太子中舍。餘依舊制。勅某。早踐官榮。克彰幹力。及有考覈。引對軒墀。宜用陟明。以旌勤效。或青闈振藻。寔踐於朝。閨或棘路陞華。共評於季法。勉膺甄獎。更勵夙宵。可。沈氏三先生集著作佐郎任桶。可。祕書丞。大理寺丞。劉長年。可。太子中舍制。勅某等。有百里之地。斯可以爲政矣。耕桑有時也。勿奪焉。貢賦有藝也。勿擾焉。衆之所利者導之。衆之所害者去之。先之則信。勞之則悅。繼之以無倦。如是而已。今爾等所居。皆大縣也。亦嘗念於此乎。有司考績。盖用常法。升位于朝。我恩則厚。爾其服我之訓。夙夜以思。無作官辱。無起民羞。無廢我不顯之命。可。大理寺丞。馬希元。魏絳。耿仲履。時選。陳安世。可。並太子中舍制。勅某等。天下治安。郡縣衆職。鉅細煩簡。皆有常法。吾士大夫當其任者。能遵之而勿失。順之而弗擾。使官無廢事。民無病政。吏無姦聞。以至於朝者。皆良吏也。以爾等竝有伐閱。在於有司。自秩廷尉。於茲二歲。豈可不遷。以勸之哉。其升東宮之屬。通籍于朝。亦足以顯矣。其益自懋。以進不已。可。胡文恭公集。呂湜。可。殿中丞。楊極。高良佐。並可。太子中舍制。勅具官某等。或進繇經明。或仕以蔭入。鄉從智效。並用法。遷擢丞。京司典治刑讞。外顯出納之吝。對宣宰字之條。局以幹聞。政用

勤著。參稽成課。進楸陟恩。優以中肩之聯。豫於儲禁之窠。始陪朝拱。尚服官箴。王希顏可殿中丞。盛行甫。大理寺丞。王詢。並可太子中舍制。勅具官某等。或憑藉蔭格。或究研律學。參承京局。外握縣條。服在廉平。訖無玷缺。最凡所上。鈎校弗疑。進陞肩尚之華。擢豫儲僚之選。並班朝著。仍寄邑同。勉思聿脩。有以自效。管朝宗可庫部員外郎。徐峻可太常博士。董壽范存。並可殿中丞。呂公垂。可右贊善大夫。李需。趙昌。王軋祐。並可太子中舍制。勅某等。書伐以期。視成於閏。考合功令。差進秩次。使在位者得以勸仰。而有力者無所忽遺。爾等。或擢自秀科。或奮從力學。亦階舊德之食。參賦治民之經。安靜無華。廉平有迹。類上三年之計。進稽六叙之文。據法當遷。在賞宜信。司甲待事。抱最相儀。尚丞典名物之煩。儲窠通表著之籍。並爲朝選之美。就服詔除之榮。務推精誠。勉思政術。牛拱辰。可國子博士。吳穆。周諧。陳舍。可並太子中舍制。勅具官某等。並達於從政。恪在首公。馴致法丞。參服盾署。或以絃歌之最。著厥縣同。或以征筭之饒。愆於局次。有司獻狀。主計爲言。年庸有成。臺格應賞。經庠峻於儀品。儲窠籍於班聯。並爲茂恩。益樹勤績。單煦可太常博士。焦盛。王傳。張允。可並國子博士。馬直方。王延慶。明穆。歐陽炳。張仲宣。可並太子中舍制。勅具官某

等或修辭干祿。或治經服官。亦藉舊門之資。早承食德之美。擢升門序。列
寘京司。參服吏勞。協宣公力。條陳滿課。鈎挾陟書。曾有積勳。訖無逋事。稍
遷禮閣。叙進經庠。乃暨奉儲之僚。並豫班朝之籍。咸思砥節。用慰遷恩。
朱湜。李隨。並可虞部。負外郎。劉襲。禮部。可太常博士。黃淳。朱處約。並可殿中
丞。張赴。可太子中舍制。勅某等。詳試則吏職修。叙進則官治。勸考課之
法。若天下之砥石。所以聳行義而激節廉也。爾等或治經素明。而食惟舊
德。或進以文雅。而拔諸畷良。參服王官。分條民政。歷三期而成最。用群吏
之計治。鈎覆中典。差次命秩。進山虞以承務。陪野蕞而相儀。盾省入丞。儲
禁升屬。且申吾賞。彌勸爾勞。張述。任伯傳。並可殿中丞。蘇盛。相里周。可
並太子中舍制。勅某等。或早中臨軒之選。或嘗籍舊門之資。次補吏。負
進丞京屬。更試力局。則牢盆之利甚饒。分宰縣。同則鳴絃之政。居最。參稽
來伐。協應陟書。對遷盾省之華。並寵儲僚之秩。益思自效。無廢聿修。謝
頤素。可職方。負外郎。趙慎微。可比部。負外郎。王得賢。可虞部。負外郎。張擇
仁。可太常博士。冀尚。王日宣。可並太子中舍制。勅具官某等。夫吏績成
於外。賞格著於中。因闕閱之成勞。速置郵而傳命。就用遷秩。以明亟賞。爾
等資承吏幹之敏。參服王官之采。肅將朝委。領刺州疆。或宣賦縣條。或典

幹事局。有寬平愛利之迹。無煩苛浚底之譏。列上計文。優中遷法。臺職之劇。則有主方。貢司勿計。惟山澤之大。繫虞衡之掌。至於奉常儀範。承華僚選。咸用流品之入。差次名秩之除。旌陟在茲。欽祗無忽。張輿可也。田貞外郎。艾保卿。沈遵。並可殿中丞。李昭慶。可太子中舍制。勅某等。朕稽勞類能。博考衆職。限年增秩。泛勸庶工。爾等用辭學之優。或世資之舊。進服王官之序。屢試文吏之煩。關握符書。參布條教。居官之迹可紀。課吏之法當遷。第用厥勞。差進以秩。墾田司盾。東省承華。並通文石之班。往服治朝之寵。益思自效。無忘稍遷。李從善。可殿中丞。趙沐。可太子中舍制。勅具官某等。承籍世資。參服官使。比更郡邑之任。咸聞節素之修。官下政成。臺中課集。參稽弗謬。擢叙是宜。用丞盾省之聯。兼備儲坊之寡。益思慎履。無忝褒恩。韓維。南陽集殿中丞。魏宏。可國子博士。大理寺丞。陳太初。可太子中舍制。勅某等。三年之考。非有顯勞。而後陟也。爾等並以幹刃。列于事守。滿歲會課。於法當遷。益勤所爲。以圖其稱。可。夏文莊公集翰林學士左司郎中知制誥李維。可中書舍人。餘依舊制。勅國家五壇布慶。六載于茲。庶位陟明。久從於鈞校。近臣凝績。特舉於徽章。以爾具官某。瑞世明姿。慶門華緒。立言以道。無外獎之勤。虛已待人。有不疲之鑒。而自陞華禁。

省。列職中臺。夙夜浚明。得大夫之體。訓詞深厚。合王者之言。而星火屢改於新陽。車服靡登於舊數。是用簡自朕意。俾圖爾勞。宜正秩於綸闈。用增榮於密侍。膺茲異選。更勵乃誠。可。周益公大全集武翼郎皇甫倜。與轉三官。除閤門宣贊舍人制。勅。具官某。淮漢以北。燕薊以南。民吾故民。土吾故土。淪陷雖久。其父老子弟。豈無戴宋而思自奮者乎。今爾崛起東蔡之間。力當一面。以少擊衆。屢收雋功。朕甚嘉之。進階三等。參華上閤。未足以旌汝也。修爾車馬。礪爾鋒刃。朕將命將徂征。而與偕行焉。可。武經郎郭昇元。係敦武郎閤門祇候。緣轉武翼郎。依例除落閤職。可。特與除閤門宣贊舍人制。勅。具官某。介于諸使。即解上閤之職者。例也。扳自衆人。進掌贊導之儀者。恩也。例不可越。公道存焉。若夫。恩以馭幸。則人主執其柄矣。往思謹畏。用稱所蒙。可。劉後村續集武功大夫。淮西副總管。御前武勝左統制。李貴。為鄂城功賞。除帶行閤門宣贊舍人制。鄂城之圍。爾當東隅。且戰且守。不解甲者百餘日。血衣猶在。吝賞可乎。既陞總戎。兼領閤職。以旌勞績。以倡勇敢。可。武功大夫。淮東總管。孫立。柳世隆。淮西總管。金之才。兩淮制司。帳前都統制。孫應武。武略大夫。淮西副總管。吳思忠。武義大夫。淮西副總管。朱世英。為漣水戍役功賞。並除帶行閤門宣贊舍人制。

連水之役。吾將士暴露。戰甚苦。三年然後克之。聞臣以爾六人者功狀來上。吾尤重閣職。命爾兼領。益殫忠力。以報國恩。可。張紫微先生集正使帶團練刺史閣門宣贊舍人制。士夫所重者節義。國家所恃者人心。懷節義以立功名。其何不濟。因人心而圖恢復。亦將庶幾。覽觀獻狀之來。殊契予衷之素。其敷贊命。以勸勞動。爾等拔從行伍之中。深明逆順之理。秉心忠壯。立義不侵。遂厲良圖。以有殊績。其貫秩於諸使。仍遙領於兵團。祇服官榮。嗣有褒陟。翟忠惠先生集尚書右司員外郎馮熙載除起居郎陳邦光起居舍人制。朕惟堯言布於天下。文武之政。布在方冊。夫唐堯文武之世尚矣。豈非當世史氏得其所託。然歟。朕躬御治朝。日慎萬機。凡君臣相與。吁俞議論。與夫國之大政事典禮。咸書之簡策。委于爾近侍之臣。夫言而不文。則不足行遠。事而不實。則不足傳信。爾等富於問學。其為朕書法不隱。以詔天下後世。豈非汝國之良史乎。周麟之海陵集唐文若除起居郎王剛中除起居舍人制。左右史。雖以記言動為職。而論思獻納。實視從臣。地近秩清。每加遴選。故本朝用士。多取於蘭臺之英。苟非其人。不輕授受。以爾文若。學瞻而詞蔚。似其先人。以爾剛中。行峻而才清。嘗與前列。或於石渠有博覽之譽。或於蓬觀有佐謨之勤。肆茲同陞。載筆入侍。惟

守官以據正。惟臨陛以盡恭。朕於此除。觀汝遠器。可陳止齋集起居舍人。兼侍講劉光祖。除起居郎。司農少卿鄧馱。除起居舍人制。勅。具官某。左右史。朕所嘉賴。以謹言動。爰自嗣服。儀圖其人。皆舊學也。爾光祖馱。頃在儲寮。蔚爲國士。而光祖繇霜臺。馱繇騎省。各以論事。不避權近。俄而去國。朕甚懷之。蓋嘗歎息。安得三益以自近也。今茲歸止。實慰我心。其以光祖序進左坳。馱擢居右陞。豈徒以是爲私乎。其繼自今。直筆在前。則出入不欽。號令不臧。將懼思焉。爾其懋哉。勿替初意。可。劉後村續集。吳堅除起居郎。徐復除起居舍人制。朕考累朝之記注。嘉先正之忠賢。襄援臺端。網條水沴。良貴叱對班之久。臣銓攻和議之非。雖異時各極騰上之榮。然萬世猶壯直前之舉。乃登雅望。以繼高風。爾堅。珪璧其身。端介不容於鬼質。爾復。玉雪之操。清貧無改於神臞。亦旣于于而來。未嘗汲汲於進。居然爲曲臺道山之重。進之侍玉階。香案之傍。戲言出於思。當謹剪桐之際。大事書之策。可無執簡之人。眇躬有賴於論思。元子亦煩於輔導。噫。祈招詩未遠。良史不知之乎。起居注不書。天下亦記之矣。祇若予訓。益修爾官。可。胡文恭公集。徐宗况。可。兵部員外郎。陳旭。吳奎。可。起居舍人制。勅。某等。朕永思孝道。儀刑前王。即路寢之秘嚴。修合宮之齋享。率義而尊配。典明德。

以薦馨香。神靈居歆。天人合况。因以孚朝慶之典。時則厚諫雷之臣。以爾宗况。行義清脩。志力強正。以爾旭。夙識經遠。學術研幽。以爾奎。方潔無渝。勁正不撓。並以瓌望。而充本朝。或嘗冠惠文。論事有切劘之益。或入對制策。納忠無回隱之私。置之諫垣。補我闕職。復能奮繇直道。數進苦言。逮齋被之陪祠。率嚴恭而服禮。熙成受祉。覃施澤勞。入妙一臺。進聯二史。往承茲渥。益思而忠。劉行簡。茗溪集。程克俊。起居郎。王銖。起居舍人制。勅。具官某。朕設左右柱史之職。簪筆殿坳。言動必書。實用自警。言。非但率循故事而已。選任之重。異於庶工。惟克俊。銖。博物能言。絕出倫類。銖由識擢。克俊次遷。蔽自朕心。式昭寵遇。勉之無斁。將觀爾能。可虞儔尊白堂集。王容。起居郎。章良能。起居舍人制。朕惟左右史之並建。所以記人君之言動。垂之萬世。以爲信書。其責顧不重哉。爾容。萬言之策。嘗冠倫魁。粵自典州。晉登郎省。爾良能。華國之文。見推士類。細書東觀。兼直北扉。即其識技之優。庸在選掄之數。爾其務存直筆。君舉必書。庶幾朕每臨期。有以自警。

永樂大典卷之一萬三千四百九十九

重錄總校官侍郎臣秦鳴雷

學士臣王大任

分校官修撰臣諸大綬


書寫儒士臣曹一奇

園點監生臣林汝松

臣董仲輅

Er 11172
50 ff
20-12-29
S.A.S.

以薦馨香。神靈居歆。天人合况。因以孚朝慶之典。時則厚諫雷之臣。以爾宗况。行義清脩。志力強正。以爾旭。夙識經遠。學術研幽。以爾奎。方潔無渝。勁正不撓。並以瓌望。而充本朝。或嘗冠惠文。論事有切劘之益。或入對制策。納忠無回隱之私。置之諫垣。補我闕職。復能奮絲直道。數進苦言。逮齋被之陪祠。率嚴恭而服禮。熙成受祉。覃施澤勞。入妙一臺。進聯二史。往承茲渥。益思而忠。劉行簡。茗溪集。程克俊。起居郎。王銖。起居舍人制。勅。具官某。朕設左右柱史之職。簪筆殿坳。言動必書。實用自警。非但率循故事而已。選任之重。異於庶工。惟克俊。誅博物能言。絕出侷領。誅日戡。崔。乞俊。



Presented by the Rev. A. C. Moule, M.A.

14 Dec. 1929.

